

晚晴籟詩匯

第十一册

晚晴簃詩匯卷二十五目錄

吳正治 一首

張天植 二首

王清 一首

郝浴 三首

劉子壯 四首

熊伯龍 二首

曹本榮 一首

方孝標 六首

柯聳 二首

王廣心 十一首

唐夢賚 五首

顧大申 九首

吳亮中 二首

成亮 一首

王庭 七首

董文驥 十二首

周體觀 二首

周茂源 十五首

鍾明進 一首

張三異 二首

程雲 十一首

謝泰 一首

陳丹赤 一首

趙吉士 四首

姚文烈 一首

謝天樞 一首

戴宏烈 三首

鄒山 一首

宋實穎 三首

邱履程 一首

徐作肅 二首

譚德馨 一首

晚晴移詩匯卷二十五

徐世昌

吳正治字當世號廣庵漢陽人順治己丑進士改庶吉

士授編修官至武英殿大學士加太子太傅諡文僖

詩話文僖敷歷中外爲政持大體鸞於內行好汲引後進己未大科以彭義門名上得首選初未識面也

種竹

退食少塵事疏篁愜遠心門無俗客到時有暮蟬吟密葉

侵階綠幽香入閣深那知炎暑厲移榻就清陰

張天植字次先秀水人順治己丑一甲三名進士授編

修官至兵部侍郎有北游草湖上偶吟

歲暮途中卽事

有雲依北近無雁寄南遣野闊孤煙直村虛獨樹閒才名

消歲月窮達半關山從古英雄迹浮沈行路間

望醫無閭山

驅馬遙看古嶽前疏林黯黯下寒煙日銜雙塔傾西向雲
擁羣峯拱北懸地發玉膏開漢上天垂赤簡紀堯年名山
閱盡興亡事鐵馬金戈落照邊

王清字素修一字冰壺號思齋海豐人順治己丑進士

改庶吉士授編修官至吏部侍郎有留餘堂詩藁

南鎮會稽山

稽山遙接越天低宛轉峯巒路欲迷青靄常浮秦望北白
雲卻繞禹陵西卽看修竹含新雨無數蒼松卷碧溪真氣
重重吹不散神靈自合此中棲

郝浴字冰滌又字雪海復自號復陽定州人順治己丑

進士授刑部主事官至廣西巡撫有中山集

詩話雪海巡按四川密陳吳三桂跋扈狀三桂深銜之撫拾保甯城守事誣爲冒功世祖燭其寃從寬流徙盛京三桂反復原官謫居甘肅無一日不讀書同戍者贈以詩云祇愁深夜裏陳殺蠹書蟲平生講程朱之學偶事吟詠皆有道氣

弔明蜀撫軍葆一張公

崇明昔遭亂明綱猶未委豈無心膂臣徵兵及蛇豕駕馭甯盡乖天地合瘡痍蜂動翕百蠻流血殷淪水燦燦芙蓉城旦夕將摧圯公持霜斧出椎牛誓介士撻發固有威忠孝亦有理遂令執戈眾感激厲廉恥復城二十七恢地二千里至今溪峒中談公猶繫齒再有邦彥亂永甯盡賊壘公膺節鉞來將卒六千耳殲滅十萬寇迅若掃浮螳距今三十年蜀運未休否獻逆揚其波羣盜縱橫起強壯膏郊

原老弱委泥滓鱗鱗萬家邑化作榛與蒿晦晦千頃禾鞠
爲稂與秕浴也叱馭人志在遵前軌遺民一何寡交以生
爲累蜀吏一何弱爭以黜爲喜吏民亦人情致此良有以
師行動以萬邑民百十止豈暇事耕耘不足供驅使況復
滇黔間伏莽叢姦宄永甯未遽入渝城師暫已賴有保甯
捷經略從茲始公當明祚衰建豎偉若彼予當清盛初匡
濟僅如此明明忠蓋業胡爲遜君子豐碑吹作塵蔓草迷
祠址聊探故老言題詩付青史哀哀巴渝人公在爾不死
同王無煩游石氏祇園

側身雙樹入花氣浣衣裳不道千年雪融成百合香落紅
媽小築凝翠溼回廊尙有安巢燕呢喃問覺王

金谷分明在相看作化城青山如假寐飛鳥自呼晴花燦

陽春笑松流大壑聲幽情誰復憾况共虎谿行

劉子壯字克猷號稚川黃岡人順治己丑一甲一名進

士授修撰有岷思堂詩集

詩話克猷制舉文雄厚排界凌轅一時推熊次侯與之頡頏順治己丑聯名上第士論翕然稱得人對策例用儷語克猷始改散體孝陵深賞之惜中道稅駕年僅四十四而卒未得與傅聊城呂武進同膺大受詩以秀逸擅勝與次侯亦正在伯仲間也

送別次侯學士

風靜天高落木悲輕車羸馬望南馳愧深玉署曾聯轡夕照師門憶共危近日文章誰與語別來期許慎相思經過儻遇眞英俊莫惜音書報我知

答詹柔尊

醉君江上閣風雨闌然春忽作十年別幾成異世人得書

如面見贈句以情申遙羨湖煙裏能於魚鳥親

秋懷

大河以北近京畿
昨歲荒涼客解衣
疲騎穿城白晝靜
春林巢鳥路人稀
黃沙古道吹風雪
蔓草寒廬閉棘扉
漢帝於今尊卜式
柏梁應笑露臺非

富池口

初日滄江宿雨醒
亂山無數一峯青
錦帆宮館灰飛盡
幾點寒鴉送客舲

熊伯龍字次侯漢陽人順治己丑一甲二名進士授編

修厯官侍讀學士有貽穀堂詩集

詩話鍾陵文自震川鹿門入八家雄偉光昌與黃岡
正相伯仲詩有才氣有魄力音響格調猶承七子遺
風較黃岡爲勝

重修晴川閣

雕欄玉柱入長空
檻外帆檣萬里通
春水遠來巴子國
雄風高壓楚王宮
鳳凰欲下簫誰引
鸚鵡無言賦獨工
直擬憑虛馳入極
雲霄何日羽毛豐

送宋牧仲下第歸商邱

祗爲秋風續楚歌
天將宋玉故蹉跎
承家不在科名早
落第真如噩夢過
懷有雙珠泣白日
囊餘一劍渡黃河
羞稱獻納空揮淚
幡鬢蕭蕭木葉多

曹本榮字木欣號厚庵黃岡人順治己丑進士改庶吉

士授編修歷官侍講學士

詩話厚庵侍講極見賞 孝陵一日讀孟子人知之亦器器顧日自得無欲汝足當之其眷注如此平生

敦尚風義學宗陽明晚游吳門卒於舟次

雜詠

盧橘新傳罷漢中尙衣聞道滅花戎諸州節使休蠲助聖

主清心在合宮

方孝標原名立成避 聖祖諱以字行號樓岡桐城人

順治己丑進士改庶吉士授編修歷官侍讀學士有

鈍齋詩選

詩話樓岡爲肅之少詹拱乾子肅之諸子亨成膏茂
 章鉞皆擢科第其命名取文頭武副當時頗傳其語樓岡
 聞戲曰於戲哀哉亦文頭武副當歸旣卒又以南山
 以丁酉江南科場獄牽連遣戍赦歸旣卒又以南山
 集探所著鈍齋文選演黔紀聞坐號棺罪連家族遺
 書皆禁燬近歲鈍齋詩選出鄂中始有傳鈔本當平
 西叛時相傳樓岡汗僞命以迎降免死卽詩中所紀
 歲月推其蹤跡似嘗見平西而復歸里跡於平西及
 靖南父子皆有投贈長律已不免愆高跡於平西及
 有論事詩謂出塞時聞山海關西地藏庵僧法乘言
 親見李自成兵敗後殺莊烈太子及定王而王永王還
 京師亦爲劉宗敏所戕其事乃不見於他書當王之

明至南京肅之首言其非頗爲時論所不與或樓岡以此陰解之歟

答吳漢槎借讀通鑑綱目

可與言今古荒邊只有君賦詩能漸樸觀史不徒文我已
中年後心難強記分幸將成敗理抉要與同聞

胡天漢日月宋代魯春秋彤管當年筆牙籤昔日樓行廚
原自富腹笥更相謀茅屋清鐙意甯徒慰旅愁

妾薄命

花冷御溝煙春風影自憐君心纔易地妾命遂占天新法
嚴霜立深恩皎日遷但求中外事一一竟甯前

白頭吟

愛妾非徒貌憐郎不在琴如何才子意亦若世人心犢鼻
忘當日風音悔至今始知秦氏女真識使君深

依韻和鞠存

此生何意有歸舟風雨江山涕淚收蓬徑特緣求仲掃剡
溪應爲戴逵留百年搖落甘三已五岳踟躕擬四愁人世
幾回堪聚散肯教離別易滄洲

樓暄

鄰園遠岫列平原爭帶晴光擁華門鎮日窗凝春氣滿小
樓人重夕陽溫吟聲金石高能出世面風霜靜者尊知是
天心憐范叔綈袍盡典不須論

柯聳字素培號岸初嘉善人順治己丑進士授知縣歷

官通政司左參議有霽園詩

詩話岸初初令棗陽寇至督眾登陣城賴以全除禮
科給事中在諫垣十八年疏五十七上稱敢言康熙
初乞歸詩
以雄渾勝

西谿小築

卜居西郭半村中幾曲清谿一棹通
度壑鐘聲蕭寺外穿林塔影小樓東
樹因初植偏宜雨竹自新移卻畏風
倦起偶來松下坐農歌處處屬年豐

出都留謝臺中諸公

離亭簫瑟動秋風帳飲青門夕照紅
八月仙槎秋水闊千家礎杵暮煙空
河梁惜別存知已海內論交有數公
烏鵲南飛渾不定嘒聲還似柏臺中

王廣心字伊人號農山江南華亭人順治己丑進士歷

官御史有蘭雪堂橐

詩話農山詩沈博穠麗宋牧仲稱其七言長篇有初唐四子之豐贍餘則嘉州信陽之間

大梁行送林平子

燕山四月槐雨涼酒徒擊筑官道旁驪駒欲鳴慘將發爲
君慷慨歌大梁大梁昔當全盛日裂土苴茅建宗室魏殿
旌旗斗北翻汴宮花石城東密定王憲王皆好才樊樓竊
窺東堂開誠齋舊帖龍文寫樂府新題鳳管催黃河如帶
縈天闕舞榭歌鐘幾時歇兔苑賓朋白雪尊鷗絃士女金
梁月中原千里接神京叔父勤王更勒名雞犬願隨淮桂
老魚龍忽厭蔡河平一朝風雨金隄決殺氣蒼茫鼓聲絕
龍章十葉赤帝孫卻立銅人水中沒滄桑變易八九年我
來欲渡愁無船宮闕崩積半深澤狐狸跟跳空荒煙偶逢
遺老驅豚出端禮門中招共入銀樓藻井荇帶穿玉殿鷓
頭土花溼因言此殿西北隅飛廉九仞凌清虛濁河波浪
埋不得依稀繡拱臨椒除我登蘭雪軒更倚端清閣空梁

天矯墮盤龍古柏陰森少調鶴下尋石洞風愴然黃塵不
到秋花鮮雲英旣死梵鐙滅誰從此地求神仙嗚呼此景
當年識近日傳聞更蕭瑟華棟都輪少府錢碧蕙盡入空
王宅河山君到莫重論良嶽吹臺總不存但得晴天看少
室短衣落日過夷門

潘山人至自遼左得季給諫消息

塞外潘生到日邊滿朝驚喜帛書傳王修負擔真千里季
布髡鉗竟隔年華表鶴歸愁自語紇干鵲下冷相憐知君
醉後攀牛角一種先皇鄙上田

短轅一哭去長安鐵嶺金州道路難搔首有天垂北斗斷
腸無客對南冠管甯木榻經秋破蘇武羣羝落日寒那信
聖恩思直諫畫圖別苑兩回看

直方夜過憶卧子談詩

偶逢宋玉過西鄰把酒重論故國春
一榻早懸陳仲舉九歌親授屈靈均
衣冠白社沈秋草賓客黃初散洛塵
醉裏寒星空自數天門騎尾竟何人

寄懷張鞠存年兄

黃葉秋蟬忽滿林客愁況是別離侵
張騫槎去明河隔賈傅書來痛哭深
漸有清霜浮畫角更無流水入瑤琴
誰憐此夜淮南夢叢桂青青露不禁

城南別業近何如白板雙扉暮色虛
秋草不知王粲井畫橋猶記伯通居
湘簾對酒明鐙夕木榻彈棋聽雨餘
不信闌干苦相憶倚來愁絕雁行疎

歲暮送孝持

讀書臺畔釣魚磯彼美談經過竹扉羽扇才名三俊重烏
衣子弟六朝非雲生枳棘鸞偏集霜撲蒹葭雁欲歸莫道
春風開徑早歲寒心事隔年違

送荔裳

上客征帆昨夜過江村風雨別愁多東山自慰蒼生望郢
市空憐白雪歌野寺開樽棲鶴雀空梁撥棹散龜鼉承明
到日應前席須話桑田總逝波

飄零十載闔閭城酒後悲歌白髮生卻爲雷霆思帝德偏
從烏雀話交情青雲啟事才名重畫鶴趨朝羽扇輕早望
故人喧列戟東南紫氣有逢迎

贈別澹歸和尚

身世飄零夢屢更雲山只抵一塵輕曾求鐵漢樓邊死偶

向金吾杖底生野寺梅花窗窈窕空林杜宇路淒清誰憐
海鶴心無繫又挂蒲團得得行

尙書墓道行

茸城北郭清明路士女提壺拜墳墓紙錢飛盡濁酒乾還
向落花深處坐楊柳陰陰枯柏晴尙書墓道滿唬鶯牲碑
滴露行人淚石馬嘶風故國情老人指點爲余說尙書百
歲高清節第宅張蒼賜予隆邱山郭泰呼號切宰木無端
又百年根株蟠互葉相連祠荒蜀相春應老劍挂徐君樹
可憐子孫繁衍如嘉木玉樹瓊枝代相續翦伐誰憂召伯
棠青蔥不改萊公竹蹉跎奕世有蘭孫二俊才名眾所尊
貧賤那知公子貴衰遲偏受少年恩配邊萬里哀笳急木
葉山頭對相泣蘇武丁年鬢已非鍾繇丙舍嗟何及軍紙

抄家盡賜莊墓田門帖更淒涼十圍老柳千尋柏官吏商量到北邙匠石操斤仰而立小者爲薪大論值昔日馬下信陵墳今日牽牛到家石鄂君飛鶴正掄才南國榎栒豈在哉輪囷生爲華棟用松楸死作濟川才昨日三江秋水闊木蘭檝戒沙棠發青雀舟中有白雲麒麟塚上無黃葉荒隧西風我重過石人瞪目雨滂沱君不見燕昭墓表千年木旣遇張華可奈何

唐夢賚字濟武別字豹岳淄川人順治己丑進士改庶吉士授檢討有志壑堂集

祈雨茶話

荷笠先傳樵客知蝸居如甌出休遲城陰黃鳥穿林早驢背青帘過市低偶爾清齋堪嘆雨無端高詠憶圍棋只愁

十日淫霖苦雙螭朋尊欲自攜

念東先生東池見招有作

疏傳歸來酒政寬黃金日日買清歡平泉不作兒孫計世
界原如缺陷看固有鏡湖歸賀監曾聞微雨過蘇端敢云
二老同時晚來往風流後正難

濟上留別朱野巖

湖上紅衣搖落時閒亭竹樹寄芳卮青門射策人皆老碧
嶽尋眞事已遲別岸蒹葭留晚照前溪簫管動離思陽關
入破聲聲慢知共琴樽更有期

過故人舊圃

十年澗壑共棲遲往事衰涼有夢知月照清尊行命酒秋
分霜葉坐題辭鳴泉初引成渠日竹樹新栽見長時一自

山邱零落後閒亭無復水平池

座間和念東先生

柳浪捎簷泛麴塵相逢一日罷樵薪誰知羯鼓催花者總是芒鞋訪道人大笑俛蟲皆寄客偏宜野鶴似閒身龍華盛會吾徒在莫待僧藝話宿因

顧大申字震雉號見山江南華亭人順治己丑進士歷

官工部郎中有鶴巢詩存

沈歸愚曰雲間自陳卧子後詩格漸衰鶴巢古今體氣足神完可以接武

詩語見山詩有高華者有悲壯者如地隨督亢依山盡河控桑乾入塞來荒城野戍鳴秋柝海嶠孤臣冷葛衣猶有七子遺響

登高邱而望遠海

軒皇且戰且學仙橋山弓劍攀龍髯吁嗟政徹不及此扶

桑滄海空青天沙邱之雲茂陵樹萬弩射魚氣張怒童男
未返青雀遙銀雁金鳧起泉路瓊田草不死蓬萊塵不飛
丹邱靈藥如可致千秋萬歲詎相辭汾陰宮瑯琊碣石麟
秋草莽蕭蕭銅仙望斷咸陽闕不見當時九鼎成鼎湖雲
氣時明滅

薛城

我登古薛城四望長太息此地孟嘗君鳴鐘會食客西撼
虎狼秦陵原羣失色再相綰齊組萬家張封邑長鉞鼓幸
舍狗盜揖左席一朝歸山邱車騎散敵國春秋祀忽諸百
戰荒荆棘歌臺嗥狐狸野人燒冢域誰抱雍門琴彈之萬
古宅

雪後登歌風臺

一劍收秦鹿秋風萬里心悲歌誰掩泣壯士已成禽井邑
新豐舊隄蛇大澤深殘碑埋野戍雪後此登臨

送紀伯紫入閩

襖褐科頭故國遺五言新體舊京詩多情愁對青谿柳老
向南荒擘荔枝

玉帳牙門異昔時憐君萬里赴戎機渡江裘馬多零落今
日參軍盡布衣

送沈繹堂編修遷大梁道

鼓角北風涼雙旌入大梁十年悲瓠子萬馬散敖倉少府
新沈璧中原古戰場君行能卧治未許薄淮陽

出平定州

忽爾危關豁羣然眾嶺低山連雁門外地出井陘西亂石

淹人跡層冰怯馬蹏相逢故鄉客鐙下手重攜

始發良鄉

上馬頻傾惜別杯
劔門西去亦悠哉
地隨督亢依山盡
河控桑乾入塞來
老去尙能持漢節
時清應不重邊才
冰霜漸邇君門遠
東望長安首重回

秋雨移酌櫟園舟中

雲滿東山急雨霏
移觴對酌兩依依
荒城野戍鳴秋柝
海嶠孤臣冷葛衣
醉後元黃鐙半燼
尊前風雨雁初飛
君看豐沛笙歌地
昔日高臺今日非

吳亮中字寅仲號易庵嘉善人順治壬辰進士授戶部主事歷官員外郎

詩話寅仲少與同里錢爾玉都光伯魏子一子聞子存昆仲曹顯庵蔣亭彥爲文字飲稱柳洲八子酒脯

筆札寅仲主之構來問堂
鍵戶力學在官有政聲

邗關夜步

千家燈火映紅妝
九市笙歌沸月黃
散盡斗金人未醉
撥殘銀蠟夜偏長
簾深豈信朝旭煙
暝由來曉不霜
從古騷人潦倒地
獨慚顧況更清狂

發渭門宿茶喜灘

連山草木繁橫縱
始鋤葺亂離二十年
親故不復集榛莽
襲衣裾誰能辨
井邑結茅漢之厓
綆短亦可汲
雲深日曛暉
作息隨出入
種菽在岡原
種麥在阪隰
麥生山兔多
況復官租急

成亮字寅天號伍嵐
大名人順治己丑進士
改庶吉士

授編修遷戶部主事

詩語休嵐幼聽甲申之亂盜蜂起待青壇相國避寇倉猝盜至休嵐以身翼父捍白刃不爲動居母喪以卒

村居

秋入村居衡水新蕭蕭蹤跡託荆榛桑田有政供吾課盤味無兼愛客頻風雨匡牀堪豹隱雲霄枯木半龍鱗朝晚起無多事課子橫經懶不嗔

王庭字言遠號邁人嘉興人順治己丑進士歷官山西

布政使

詩話邁人居官清惠罷歸後足迹不入城市詩品甚高直抒胸臆其神似陶韋處非從摹擬得之詠澹關云代更于戰少勢在一夫多感慨無盡語尤警絕

雨後

落日殘雨餘林樹半昏黑南山白雲閒澹然見秋色冷風

何淒淒微微野煙息歸巢鳥更鳴當戶蟲還織惆悵獨坐
時悠悠思何極

秋雨遣懷

抱病身獨閒起行日云晏蕭條空林中靡靡秋雨徧殘葉
踏飢禽荒村吠寒犬虛室靜琴書閒階冷苔蘚欲愁生計
疏還嗟世情淺自適在邱園匪能薄軒冕悠悠歲月深閒
情誰當遣

送褚君培

夕陽送君去浩歌成獨還君來山窗下竹石如我閒眾鳥
自棲息月明溪水間柴門復誰待呼童方閉關

所思

所思竟惆悵夜寒風雪深嗟君重離隔感此孤曠心將以

路云遠幽夢能見尋翩然發清興爲我彈鳴琴柴門宛如昔相送在南林共言別來意日暮愁鄰礎

棧道中作

人行山上高天在山中小圓暉易沈夜初陽遲報曉馬走山樹巔飛鳥出其下雲連深洞迷石缺危橋架七盤非險途三秋足清景日夕留泉聲誰能辨喧靜

潼關

關門高鎖處飛鳥不能過雉堞連羣嶂風煙俯大河代更千戰少勢在一夫多入夜聞刁斗軍聲壯若何

曉雨

獨鳥鳴南園曉來雨初息空庭生秋陰莓苔長寒色

董文驥字玉虬號易農武進人順治己丑進士歷官甘

蕭隴右道有微泉閣集

詩話玉虬懷古諸作蒼渾激楚有節短韻長之妙漁洋賞其題淮陰侯祠春雨王孫草靈風古木叢二語又有汾陽道中詠梨花云待人雪夜寒無粟騎馬平明淡掃眉亦用事無跡風韻絕佳

故關

神都西北界天險設故關連山千里來微徑綫縷間斷崖
刺天仄金城本塹山崇墉冠其缺雉堞紛迴環入谷騎擁
塞緣雲鳥飛還一夫荷長戟百萬未敢攀白挺昔奮呼來
去無險艱防虞此何及守在羌與蠻

緣無定河行

昔聞無定河遠使河之涘源自大荒來濁浪吼千里奔流
何湍悍頽沙性善徙地是古戰場四顧悲曷已其窟漲征
魂貂錦三千死時清無戰骨水寒終北鄙磨刀刀未瑩飲

馬馬不喜一望塞垣深九月邊風起歸渡會冰堅悲哉宦
游子北首溯河源怨此南流水

和吳學士梅村送王元照

故國重來客薊門宣和遺跡一無存白頭只索丹青引文
彩風流舊子孫

暮抵蒲城望餘雪

秦山雪後看餘雪半峯寒馬色斜陽盡車聲古道乾金城
悲麥秀玉殿想雲端暮鳥歸飛急王程尙未安

驪山溫泉

山上千門山下池玉環何處洗奚兒野人分得溫泉水菜
甲紅於錦荔枝

三月廿二日汾陽道上見梨花折得一枝口號

東風遠到晉山遲三月梨花始放時
雨裏粉痕殊鄭重月中空色共迷離
待人雪夜寒無粟騎馬平明淡掃眉
九十春光故園外鄉心客眼寄瓊枝

題長平驛壁

上黨南來狠孟城連山地險不利兵
鼠鬪穴中勇者勝父書能讀徒空名
趙王何愚趙人哭國中壯士盡長平
土花血碧拾金戟戰場處處今人耕
已降殺盡爲鬼雄前有銳頭後重瞳
杜郵之士烏江水劍且賜兮船自艤
六十萬人含笑死

北邙山

陟彼北邙山纍纍滿昔賢松柏推爲薪
原陵犁爲田石馬卧秋草玉魚出下泉
而況洛城內歌舞化寒煙燕趙有佳

人蓬萊有神仙一笑輕千金一丸駐萬年

復過井陘口淮陰侯廟

背水千年廟登壇百戰功至今思赤幟何處弔藏弓春雨
王孫草靈風古木叢淮陰年少子終自笑英雄

眞定客舍對雪

窮陰滿太虛積雪凍庭除鴉點埋雲樹童依宿火廚君思
狐白厚老病酒杯疎江國寒梅早垂垂已待子

庚戌元日移家惠山舟中作

東風自信片帆斜百里鄉園路豈賒愛聽山泉因煮薺並
驅雞犬似移家未聞春鳥來檣燕已見寒梅笑岸花萬國
朝正看北極十年拂霧馬歎沙

去年元日棄孤臣趙北燕南滯病身八口一舟遷易散吳

山楚水信難眞卽看妻子還疑夢高卧江湖又早春只恐
鶯花饒笑我拂衣斑鬢已如銀

周體觀字伯衡遵化人順治己丑進士改庶吉士歷官
江西參議道有晴鶴堂集

贈陳伯璣移居

重開三畝宅環堵正相宜花落春城晚人歸故國遲鑑湖
原是曲鄰笛爲誰吹獨踏庭前月依稀授館時

秦笛仙赴岳州兩夢見之

薄暮輕爲別扁舟去渺然干戈南國外雨雪大江邊信宿
行應遠登樓望獨懸春來能幾日客夢益相牽

周茂源字宿來江南華亭人順治己丑進士歷官處州

知府有鶴靜堂集

詩話宿來早入幾社才力尙不逮陳卧子李天章諸
人官此部時與同署宋直方施愚山相過從飲酒賦
詩風雪不輟列
燕臺七子中

苦寒

我行適南服絺綌生微涼山川倦游覽草木多隕黃商飈
一以至莎雞鳴我牀弭策且延佇駒隙殊未遑誰云甌土
燠重纒無嚴裝堅冰旣已合甯獨驚履霜薄帷障虛館堪
戶鮮閉藏中夜不成寐攬衣起徬徨游子倦行役歲晏思
故鄉雖復羣動息萬籟增感傷噉噉雲中雁天風吹枯桑
寒夜飲董閭石齋沈醉而歸因以自嘲

積冰盈四衢言赴江都約座中四五人顧盼皆英倬主人
兄弟賢愛客善諧謔周生本不羈忽爾過三爵悻悻弄明
瓊鹵莽呼鑿落華鐙吐焰微霜月逗簾箔夜分客未散都

覺颺裘薄屣履下階來一醉忘酬酢空負拍浮名不復勝
杯酌豈意僕射酒竟類羊公鶴

天目禪師自僊巖枉過旅館

繡佛清齋久微塵拂鏡臺擬參龍井去翻度虎溪來月色
諸天淨潮音五夜回片言聞了義花雨落莓苔

玉華洞

尋山玉洞幽縹緲上飛樓冷翠常疑雨空巖總似秋石壇
延鶴駕雲海望麟洲款段依鄉井眞嗤馬少游

暮抵汀州詰旦與成子分道

入暝方停轡勞歌易感傷怪禽禡社裏孤犢火田旁淡月
嘯螺女陰風舞蜃郎那堪同旅別明發尉佗鄉

贛江舟次

雙流移棹促篷底亂山斜細雨紅蕉葉輕風白葛花客行
灘路慣愁對楚江賒聞道青原近無由訪鹿車

舟泊錢塘

津亭極望海門遙水國輕寒夜沈寥隔岸青山神禹廟中
流白浪伍胥潮春星萬點連漁火宿雨兼旬變柳條咫尺
桐江圖畫裏牽舟無奈石尤驕

春日過桐廬晤張無近

離情猶憶薊門花邂逅津樓感鬢華繡嶺春深紅藥潤晴
江漲後白鳩斜遲遲拄笏看朝爽歷歷揮絃對晚霞爲問
桐君仙宇近玉潭幾處滿丹砂

舊山

舊山無恙掛煙蘿此日傳烽竟若何笳鼓江關屯虎豹樓

船海國混鼃鼃千重錦樹浮雲暗滿目寒松落照多愁絕
正逢南客至鄉心細與問漁叢

懷季天中給諫

遷客音書隔歲回窮交萬里塞垣來短裘射虎陰山暮霜
管題詩獨石開遼海沙寒沈劍珮淮南木落隱樓臺關門
生入應青鬢不待班昭疏屢裁

去年徒跣出都城灑涕呼天送爾行漢苑鶯花虛諫草燕
臺風雨作商聲馬潼羊酪愁顏老短笛悲笳放夢驚山水
烏丸稱絕麗畫圖何似玉泉清

秋杪坐雨柬蒼水

登臨蕭瑟最愁人况復窮秋雨浹辰簾外掃花芳徑滑渡
頭沽酒夜湖新西林小鳥歸紅樹南浦輕條上白蘋料爾

閒居應有作羊何甯厭往來頻

蒼玉洞

郊行十里碧湍隈縹緲蒼巖見玉臺石作蓮花疑華岳山
移銀闕近蓬萊仙人月夜驂鸞過游女晴春拾翠來卻恨
斜陽催客騎無由道左一銜杯

過陳黃門墓

碧血當年濺鐵衣猶餘蒲首入泉扉草深斷碣眠香麝花
落空山叫秭歸夜雨靈旗嘗自出秋風石馬竟何依大招
擬賦還停筆挂劍潛來恐是非

贈總憲龔芝麓先生

楚江涵遠潤衡霍動靈光哲輔乘時出醇儒翊運昌卿材
三策祕帝眷九遷良絳灌功難並夔龍讓未遑殿前推執

法海內頌惟康久缺埋輪使仍多題柱郎誰人持國紀特
與勵官方密勿來申命訂謨足大匡中丞親佩印副相獨
登堂文采蘭亭聚稜威柏府彊朱軒排曉霧白筆麗秋霜
鬪自騶幡解邪因鳶角藏格天封事切名世表儀莊班劍
連珠烏微鏡映紫囊鮑宣懷直亮熊遠著清剛峻若盤鵬
鷲祥猶集鳳凰讀書還見士授簡更飛觴儉匪菑川被貧
逾蜀郡桑黑頭公望重黃髮壽朋臧蓬矢今初度緹灰怡
肇陽莫窮薰草歷無算吉雲漿元鶴金庭迴丹藁玉井涼
上尊膺秬鬯仙樂播笙簧一德真同泰祈年衍慶長

鍾明進字子佳號偉弢長興人順治己丑進士歷官惠

州知府有兩粵吟南園集燕中草

詩話偉弢權知廉州值耿精忠之亂城陷脅降不屈
囚諸鬱林亂定傅忠毅爲疏請甄叙格於部議歸老

於家

鬱林除夕

旅中歲月恨淹留此夕偏驚斷梗浮
鼙鼓山河烽未靜梅花村落笛多愁
不堪臘盡悲霜鬢又聽更殘報曉籌
萬里鄉心何處達夢歸猶恐過廉州

張三異字魯如號禹木漢陽人順治己丑進士歷官紹

興知府有來青園集

詩話禹木初令延長歲旱蝗施粥平糶飢民賴以全
糶南陽同知唐縣民謝萬程以父喪不能舉鬻其妻
郭郭至人家不失節或以逃人訟於官禹木廉得實
召萬程至捐金贖郭俾爲夫婦如初一時傳爲嘉話
遷守紹興亦有惠於民

美斯橋步月

秋盡寒砧急溪光上客衣人煙和露冷野色襯霜輝竹遠

敲風細林深逗月微漁翁貪共話忘卻掩荆扉

夜泊危家渡

白露凝帆冷鐘聲出寺南月華穿曲徑山翠落深潭舟泊雲同卧鐙殘酒半酣縱多愁緒在不敢負幽探

程雲字天翼萊蕪人順治己丑進士官孝感知縣有松

壺集

詩話天翼所爲百喻詩雜取諸家勵志訓俗之語澤以文藻辭近指遠今體詩清勁質實擇言雅馴不蹈公安竟陵兩家末流之弊惟不甚講聲律爲其疵類集中有和王阮亭彭義門無題詩自注謂未見王彭詩原作感舊集亦未採錄其詩蓋與漁洋雖同鄉郡不通聲氣當時知其能詩者不多也

徂徠

不爭岱岳尊所隔猶尺咫面面成一方百有六十里五汶夾之流不然滔天起孫石讀書臺峯粵不容趾至今竹溪

用明卷言 四十一
三
存千載思高軌矧其對衡門朝夕互青柴或言采昌陽可
以延年祀飲酒不暇仙終焉聊復爾

秋日赴飲田家

曳履行徐徐秋老一望白到門槐柳合入門踏牛跡羅坐
斗室中瓜蔓上屋脊春田夫禮貌恭欲言笑啞啞今年幸薄
收所餘一斛麥貧家無釀法苦酒如黃蘗稚子挈壺出短
几不盈尺可以采圃蔬棗熟亦堪摘是時山雨過微風入
籬隙向夕石路滑歸家借襪

朱不凡醉綠亭

東隅亭子秋尙酷茂林繁露溼朝旭早起科頭過板橋憑
闌澹寂恣遐矚老藤化石骨崢嶸古螺吸水苔衣綠攜來
幾卷陶柳詩僮子爲我沽醴醪

輓王禹符

誰爲銘墓石欲泣已無聲
吾黨論兄弟斯人見性情
夕陽孤樹直寒月短碑橫
垂白雙親在九原恨木平

東蒙秋日

九日易爲風淒其遠望同
碧山分雪白黃葉變霜紅
客夢初聞雁鄉心久憶菘
祇今將改歲何以謝東蒙

送還雅

孤館何淹滯兼逢世難中
秋深終一別日暮暫相同
客路沙邊雁人家岸上楓
甲兵猶未戢消息可能通

郭同年冰湖道過孝感

咄咄吾兄弟除官似逐臣
孤帆臨百粵萬里背西秦
薄海威無敵窮荒僭未賓
安能久抑鬱去住總悲辛

涉汶

九月徒杠少褰衣及半途岸容高自出雲影澹如無白髮
心先冷清秋興愈孤道傍馳馬者應不識潛夫
驅驢行不進延佇立沙汀兩岸蘆花白一行雁影青抵家
惟數里薄暮已多星祇有田家樂柴門早自扃

往東村

不爲省秋稼何嘗欲出門斜陽留一岫疎雨隔前村棗尙
垂荒隴桃應落故園及時爭刈穫野老領兒孫

客歷陽成同年牽菴憶初園中秋酌桂

疊石爲山暮景寒扶疎繞徑此憑闌百年月在尊前出千
里人來雨後看手澤不忘桑梓敬真觀豈受木樨謾拂衣
早遂初年志難種江泉續蕙蘭

謝泰字彙征號建侯大興人順治己丑進士官竹山知縣有蓼集編客中吟

從軍行

月在人千里君從月下
行不知君遠近惟見月
分明斜漢垂秋揆寒蛩
泣露清征旗何所往
疑聽夜笳鳴

陳丹赤字獻之號眞亭閩縣人順治辛卯舉人歷官浙

江溫處道殉難贈通政使諡忠毅有客吟草

詩話忠毅爲政持簡歷官皆有政聲取精忠爲亂溫州總兵祖宏勳叛應之忠毅與永嘉馬奉璋大令嚶皆不屈死難事定褒卹大令贈布政司參政諡忠勤建雙忠祠於道山民間歲時祈賽至今未輟

晚泊乍雨

一葉臨孤岸微茫煙雨中
濤聲都帶白霜葉漸留紅雁影
拖殘照漁燈映彩虹陰晴
渾未定身世託飄蓬

趙吉士字天羽號恆夫錢塘人順治辛卯舉人由知縣

歷官戶科給事中有萬青閣自訂詩新又堂詩

詩話恆夫初宰山西交城寇阻山劫殺恆夫乘雪夜
督兵深入破其砦寇遂平以是有能聲遷戶曹郎入
諫臺官京朝甚久嘗築聖城西號寄園有池館花木
之勝日嘯詠其中金壇于漢翔章雲投以四詩恆夫
依韻酬答後凡遇他題皆用此韻積至千首署爲林
臥遙集編次入集中後又廣之得五百首署爲千
破餘兩種又合刻集外別行和韻詩始自元白
恆夫疊至三百數十次蓋古所未有亦創格也

贈吳田吳慎先

人不得其真舉動多蹉跎所以古達人任天無羈束我獨
重吳公本來輕寵辱數畝傍清溪分種秫與粟戶外橘柚
香窗中巒岫綠叩扉素心人一尊醉醺醺安居無所營澹
者乃知足

柯城送任文階還陽羨

竹舍青鐙漏未沈
夜寒先入旅人衾
一簾煙雨難爲別
千里江雲共此心
意盡還聞巖半嘯
曲高止作郢中吟
莫愁我輩長貧賤
爨下枯桐有賞音

欲歸

暮角吹斜鬢
孤尊佐客饗
雲移新雨月
霜斂近秋松
谷口清嵐染
巖尖紫翠縫
欲歸歸未得
殘照曳疏筇

戴田有歸江南程香升入幕秦中別後登樓玩月鄉

思轉深

墨香縈滌硯
入座愈清輝
韋柳真詩在
求羊好友稀
樓高孤月伴
石古亂綦圍
年老難成寐
家園無夢歸

姚文烈字覲侯號屺懷桐城人順治辛卯舉人由推官

歷官楚雄知府

別友人

三春朝夕感殷勤，又看榴花隔院分。
惜別江淹纔有賦，送窮韓愈久無文。
輕風紫燕高低出，永日黃鸝遠近聞。
尊酒不堪長嘯傲，湖山煙水惜離羣。

謝天樞字爾元號星源侯官人順治辛卯舉人官慶遠推官有嶺外集

重九偕許有介山居讀書

數茅結似老僧關，四面青光落古顏。
聞我兩人當九日，讀殘半卷暝千山。
天平秋氣綠菰外，客瘦夕陽黃葉間。
風雨滿城聽未得，此中高卧不知還。

戴宏烈字山民號鐙巖桐城人順治辛卯舉人官成都知縣有朗瑯齋集西嶽游草

同黃子正出居庸作

偶謝承明去聊爲塞上行
千山橫朔氣萬馬動邊聲
上谷風沙暗漁陽鼓角鳴
江南庾信在蕭颯盡平生

九江

戎馬瘡痍已十年
潯陽灰劫倍堪憐
水分九派濤聲闕
山抱孤城塔影懸
野燒荒原銜落日
秋風廢壘起殘煙
蕭騷此際江州客
一曲琵琶意惘然

懷孫大振公雲間

卧病荒村歎索居
故人懷抱近何如一
時湖海交游盡
千里河山戰伐餘
夜雨空庭常對鶴
秋風古渡正烹魚
遙憐有客飄零久
不寄征鴻尺素書

鄒山字宏景號禹封天門人順治辛卯舉人官玉山知

縣

初聞罷官

到今方賜罷執政恕微官覆局終何定纔休便已安旁人
爲削色稚子羨加餐正好賦歸去移文報北山

宋實穎字旣庭號湘尹長洲人順治辛卯舉人康熙己

未舉博學鴻詞官興化教諭有讀書堂老易軒玉磬

山房等集

八月十八日觀潮

頭白燈明急管催高樓晴檻倚江開潮聲夜靜千帆轉斷
岸風迴萬馬來吳越山川供醉眼古今天地獨登臺九秋
蕭瑟誰堪賦滾滾詞人庾信哀

和鈍庵歲暮雜感

年少才名也自雄老來城北半飄蓬閉門種菜渾閒事輪
與人間霹靂弓

五十誰能讀五車黃庭白帖任冬餘江門老子詩偏好只
對青山不著書

邱履程初名廣生字鴻漸成都人順治辛卯舉人

寄費二參軍此度嘉州

刀鋌初出骨空存又曳輕裾上將門才略自能追越石旌
旗誰復似桓溫芙蓉麗發新文藻薜荔衣香舊夢魂志士
何妨聊袖手空山歸卧聽嘒猿

徐作肅字恭士商邱人順治辛卯舉人有偶更堂集

過周肯衛東村

僻地容來往秋天別業清傾壺耽一醉好雨坐三更近水

暮雲入新田晚稻平閒閒堪著賦何事欲關情

人日同友人游闕伯臺因過草寺歸留小飲

今歲今時春早回絕憐晴日淨纖埃遙青欲起梁王苑占
寺爭馳闕伯臺茗椀空郊開土竈梅花小榻故人杯還看
淑氣深相引次第羣芳杖底催

譚德馨字紹元號又庵新會人順治辛卯舉人有又庵

詩集

喜晴

竟日攢眉坐今朝一放顏白飛歸壑水青送隔江山牧笛
平林外漁罾落照間野人防雨意猶帶綠蓑還

晚晴移詩匯卷二十五終

晚晴彞詩匯卷二十六目錄

范承謨 四首

嵇永仁 四首

傅宏烈 三首

曹爾堪 十六首

王士禛 十六首

王士禛 十首

王孫蔚 十二首

程可則 八首

沈荃 四首

耿介 四首

笄重光 五首

楊素蘊 二首

張永祺 四首

丁思孔 一首

項景襄 二首

張可前 一首

傅感丁 一首

郭棻 九首

余縉 四首

王廷璧 二首

李昌祚 一首

劉必顯 一首

葉矯然 三首

張潛 一首

張晉 四首

楊端本 六首

曹同統 一首

陳維國 二首

趙原 一首

戚藩 一首

晚晴移詩匯卷二十六

徐世昌

范承謨字覲公號螺山又自號蒙谷漢軍旗人順治壬辰進士改庶吉士授編修官至福建總督殉難贈太子少保兵部尙書諡忠貞有范忠貞公集

詩話忠貞爲相國文肅公仲子初以任子官侍衛入詞館後由學士驟昇封圻撫浙四載多惠政迨督閩值耿精忠叛被幽七百餘日不屈遇害今所傳之百苦吟畫壁詩皆精誠貫日可與文山正氣歌後先輝也映

句留吟

此鄰礎驚夢憶舊之作也詞內藏署中同時被難諸人里族字諱

春日溶溶向夜深松濤碁韻漏沈沈蘭亭少長頻來夢踏泛句留指碧岑碧岑高矗雲盤曲四野青濛星陸續手拂瓊霄袖落霞目低銀漢迴衡王玉衡遙指鳳凰城望美人

兮心忤忤瘦骨雖無縮地術冰心尙信自天成仰天欲語
心轉苦懷抱縱橫天尺五奕葉貂蟬著國華肯將姓氏汗
家譜倦眼迷離望莆田酸風如箭射眸穿三年破榻悲誰
語幾堵頽垣痛各天各天同難天應祐紫電青霜烏巷冑
將軍親執繡雕旗躍馬直前真盪寇一戰成功抱犢開朝
來泛水暮留山那知多少東陵興都付西風殘照間董賈
文章蟲唧唧窮通貴賤禪中蝨誰御長風汗漫游我欲從
之萬事畢恍忽天際兮來我真人駕玉麟兮飾寶琛建朱
旆兮耀金廷邀王喬兮酒數斟舞袁公兮撫真琴韶武迭
奏兮開余素心何以處此寂寞兮聞太古之元音繼而坐
予芝山之巔雙松之下啟口微吟曰海日升兮東方明卿
雲爛兮泰階平仙霞開兮役五丁山魃馘海鯢烹何爲悽

愴憔悴兮日勞勞而自戕其生君不見畫角鳴兮鼓聲起
爲我慇懃慰諸子義仁忠勇萬人魁永壽芳名紀青史余
乃爽然而驚肅然而迎三星在戶四顧一縈情耿耿礎聲
清

武彝曲

不見筆硯者幾年矣病卧中偶成武彝一
者團食窗外乃閉戶垂幕徐出寸管滴於片石
間恍然如覩故人嗚呼痛哉拭目展紙之際臂酸
毫重頭眩心搖因是數作數止半掩半舒揮淚奮
毫者移時方竟孤臣血淚義俠高風於此可以略
見耳且予自罹難以來眼前所有一切非舊獨獲
署內御歷一册朝夕捧對每逢君親吉旦以至朔
望諱辰預自濯體齋心肅於五夜強起著我衣裳
倩人扶掖荷械北向拜祝遙殫愚忱並效蘇子卿
坐卧不離漢節之意儻予業緣已畢塗血有日遂
我報稱之俟逆氛掃蕩密檢其慝同此數點殘淚
合而貯之書悉我堅志苦衷感佩雲誼當與河
山並永紅螺寺巨辨行者殍賦贈武彝山
人時大清康熙十五年二月初五日也

吁嗟嗙淮陰未遇兮漂母哀螺山落魄兮武彝開漂母一
飯兮情生俄頃武彝三歲兮凝結成疇自是有心知順逆
非因瀕死起寒灰三月十五雞曉晨轅門甲士往來頻氣
色非常人共駭城頭雷礮崩蒼雲蒼雲未散搥鼙鼓天吳
欲沸刑天舞直憑談笑折狂鋒刀戟如林何足覩刀比霜
兮戟作林兩廊殺氣遏飛禽君恩臣節當今日后土皇天
鑒此心此心久許主人死誰解全軀保妻子可憐相向大
中丞俯首無言但爾爾一身九鎖聲郎當鬼火空房淡日
黃百計勸餐羅糞土踢翻几案蝶飛揚吁嗟嗙我凜如霜
兮人呼鐵面我衷如火兮人難自見世受國恩兮父子兄
弟敢忘報稱兮骨削血濺既墮鬼隅兮言返吾真咫尺首
陽兮幸與爲鄰常山舌利兮鯨鯢膽碎吐氣如虹兮斷齒

截齷左右難堪兮怒色加環睛按劍語聲譁十日肉枯神
愈健咆哮怒者亦興嗟武彝武彝古人風慨吟包胥賦孤
忠秦庭七日能完楚君更餘三將無同君何不忍須臾死
未必天心遽如此懷光希烈真奇兇終須斬馘獻天子君
不見公孫杵臼告程嬰成事稱難死事輕無論鴻毛與秦
岱漢節終歸蘇子卿我聞此語轉增苦我何人斯比蘇武
暫吸滴水效吞氈可能鍊石將天補垢面蓬頭欷復歔滿
前異類總狂且生何爲兮死有恨朔望踉蹌拜帝書多君
慷慨心如揭吾亦披肝飲君血炎荒毒日渴喉焚涼我燕
山片片雪冬月悲風透骨寒殷殷雅意續還熱一曲長歌
筆未終啾啾四壁蟲聲咽嗚呼誰爲瀋陽之裔兮子暨諸
孫覩此片紙隻字兮須知爲死血將盡之流痕當思何以

處此兮慰我生前未了之幽恨吁嗟噤滿目冉冉兮八千里外之游魂若使悠悠復泛泛辜負親恩與國恩子寫武竟不覺慨然於中也久不親筆硯乍逢故物悲從中來兼子姪輩不知妖氛逆焰中尙有懷忠抱義任俠者沈埋其間而能物色孤臣逆焰中尙有懷忠抱義任俠者沈埋其延則爲鞠躬殫節之人具此膽略以任疆場之事則亦君城禦侮之選也子家兄弟子姪儘能效古大臣以人事君之名鼎閭之泰甯人也行者殍何辱親敗子誤國庸臣范承也

稽留山奇觀騷註參證詩以紀之

屈子沈抑千載無一人知其世出世

一片濟人熱腸不意際此顛隕之秋困頓英哲俾獲著述傳世流播無窮留山可爲三閭知己上帝

懷沙匿奇迹忠彰道未揚抑鬱千載間蘭蕙隱華芳值茲顛覆初哲人罹危疆冥會著遠游汨羅忽翱翔浩浩水無

垠莽莽雲俱蒼應知素心人掩涕不可將

絕命詞

逆初背烏鵲南噪曉聞王師已逾仙霞取劉二
禁卒偵知其情密以慰余余笑曰二逆即投
誠終不免然必先殺我以滅口因口占示之

一笑襟開萬怒平龍興有寺葬真卿執旗厲鬼爭前導埽
盡穿牆穴壁甍

嵇永仁初字匡侯字留山又號抱犢山農無錫人諸生

隨范承謨死難贈國子監助教有抱犢山房集

詩話留山以諸生入幕臨難不渝在獄諸詩忠義
之氣凜然如生子若孫兩世章平知其貽謨遠矣

憔悴吟

癸丑秋邑侯吳公饒余於聽梧軒招集秦太
史對巖陳進士椒峯暨詞客父山夫余淡心

諸子同拈踏莎行詞未以憔悴二字限韻詞中有
孤城殘角夢家山亂帆影裏人憔悴之句舊心
忤動歸述之遂促余行至幕府日輒病脅痛欲絕恐
居不祿之辰歸念頗切舉顛末告之蒙谷蒙谷為
余解憔悴之意亦和一詞詞內有云城郭無光村

煙失翠管然一見心如醉停驂暫緩入山期哀鴻
待爾離樵悴余讀之驚愕私謂許子九日對者
心之聲也何爲作此不祥語許子亦慷慨相言者
嗟知將不免因決情而去卒脫於難余緣情勉留
遂速於禍非知幾之暗也情所感激不忍去也不
忍去而去非但薄情抑并悖義嗟乎嗟乎禍患有
因端倪先兆今日樵悴至
於此極余固久知之矣

余本抱犢人東皋有荒田荷鋤將經營課僕耕雲煙天南
節度不肯放聘書早到薜蘿邊薜蘿閒挂處士牆處士一
去令君傷招攜賓客置餞觴吐詞製調魂飛揚有心負米
戀草堂堂上念舊催治裝可憐離別九迴腸陟嶺逾灘躋
險峻一步一望吳天長羈縻伏枕藥鑪間海濱倦鳥思飛
還好音慰藉情凄婉勸我停驂遲入山好友掉臂行病夫
銜淚住張羅設網日月昏冥冥翔鴻去無路雨雪從來霰
集成著龜四體先分明自是愚忠被束縛休嗤野客迷歸

程吟來憔悴看雙鬢只恐秋添宋玉情

顛倒歌

從前相依蒙谷者受其恩辜其德盡爲衣冠中之茅齋及受難日此輩皆不與豈奸狡之

徒巧於攫金者亦善於避禍歟余與林翁能任王翁幼譽沈子天成皆落落寒素家無儲石之儲堅守經硜之志與公誓同患難不畏刀鋸不豔勢利逆雖百計挫磨初心不拔彼奸狡者應擲揄呆漢之舍生取義也

顛倒英雄孰是非伯夷餓死盜跖肥太史著書發悲憤問
天不應增獻歎寒士好古艱遇合牢落科場遭踐踏肉眼
豈識璞中玉銷魂還逐風前蠟家徒四壁依傍人巧者致
富拙受貧憂讒畏譏歎維谷猶幸知己愁眉伸道義相交
澹如水金多交深物所鄙小人有母孰養之千里輕身浪
擲死死忠死義原相成惟有罔極魂縈縈山鬼揶揄誇明
哲閭里溫飽翻偷生辜恩報恩口莫計世上休輕天下士

金烏玉兔疾如梭，千秋難解顛倒意。請君熟讀顛倒歌，英雄英雄可奈何。

擬古詩

蒙谷以炭畫紙上書顏杲卿伯夷蘇武三古

死既不得十日絕水漿求死又不得是杲卿伯夷天已不欲令其繼之也無已請學蘇武

常山舌既乾兩耳了不聞聲留白刃間遲迴過陰雲首陽腹已餒薇蕨徒芳芬精氣彌豪放鼎食安足云維彼蘇屬國持節收羌羶十年如一日冰雪嚼紛紜求死既不得堅志豺虎羣從容與激烈大道原無分上林口雁札終得達聖君願言勵忠悃天心將罷軍

紅橋莊歌行

癸丑秋余婦送至吳門止於外家之紅橋莊是日天色甫明薄霧漫水面乳媪

抱兒輩佇立岸上若不勝慘切生離之狀人非木石孰能無情每一迴思腸寸裂矣

秋風蕩漾扁舟早，雙槳到門攬懷抱。薄霧籠煙水氣蒸，雞

鳴桑樹催晨興懷中潔白鷺湖綾眼枯難拭淚痕疑良人
遠游意飛騰不知前路多寒冰雖然弧矢分所應臨深履
薄生戰兢上有高堂下乳稚養親教子將何憑出門兒女
愁葛藤欲語不語長撫膺矯情揮袂急解纜蒹葭搖落鳧
雁升野老滌場將打稻漁翁撥刺亦開罾惟有征夫捨耕
釣紅橋莊上畫欄凭

傅宏烈字仲謀號竹君進賢人舉人官至廣西巡撫撫

蠻滅寇將軍加太子太保諡忠毅有傳忠毅公集

詩話忠毅初官慶陽知府奏吳三桂陰謀不軌坐離
間遣戍梧州及三藩變起糾合土司兵盡復廣西地
進規雲貴爲叛將馬承蔭誘陷賊中不屈而死臨歿
書絕命詞云自分一死無餘策身爲厲鬼誅羣賊忠
取之氣可
貫日月

憶山居

當年松菊徑悵悵問何之既覺山爲遠方知我在茲嵐收
孤影秀雨歇半峯奇便作悠然賞臨風每繫思

清遠峽

暝投雲際宿疑作水中仙羣壑去無路斷涯窺有天清猿
嘯嶠月白鳥宿江煙往問前山寺飛來有幾年

絕命詞

自分一死無餘策身爲厲鬼誅羣賊絕食依然浩氣存鼎
鑊刀鋸求不得天不假我以速終天心人意莫可測吁嗟
徂矣命之哀惴惴生平無薄德

曹爾堪字子顧號顧菴嘉善人順治壬辰進士改庶吉
士授編修歷官侍講學士有杜鵑亭南溪客裝里音
等集

尤西堂曰曹顧菴學士承宗伯峩雪先生家學復以
高第入玉堂海內翕然有談遷彪固之目博聞閎覽
下筆數千言所著南溪文略鼓吹六經酒漿諸子沐
裕潤澤於入家之中而尤工於詩庶幾乎登開元之
堂入大厯之室間以餘技綴爲小詞第其品格在眉
山渭南間沈歸愚曰學士性英敏所過山川扼塞
無不指掌形勢人與之游凡姓氏里居官爵與所覽
詩文積久不忘卽虞世南之行祕書可移贈也詩文
頃刻成同館

無與爭捷者

詩話顧菴聰察開朗有經世之志景陵深賞之許
爲學問最優坐是見嫉中蜚語罷歸同時京朝諸公
多賦詩以餞沈釋堂詩曰天涯話別重蕭騷客舍今
年醉濁醪荏苒星霜舊雨遲迴鏡火戀同袍名山
蠟屐秋應健白社題詩老更豪歸及萊萸佳節近知
君何處獨登高程周量詩曰居然天外作閒身大笑
東華十丈塵既有門生能抗疏不妨夫子獨垂綸伯
牙臺上誰千古范蠡湖中又一人祇是故交隣話別
菊花時節淚霑巾門生抗疏謂廬陵張贊
山學士同時以直言去國顧庵門下士也

游吾谷

高天熱未平深林綠已老知是古人宅瘦蚓號陰草追維

廖賴徒探尋極深宵土腴泉更滋迴峯兩肘抱重扃漆鏡
黑一聲天雞曉人來鳥雀去葉大颺颺小楓赤游更佳秋
心已縹緲

嘯臺

李空同撰碑左國璣書

兩山翠柏搖天風古臺突兀荒山中宏正殘碑斷復續左
氏書法文崆峒摩挲句讀歎古雅萬顆真珠春自瀉中散
原非入道姿公和本是逃名者人間機弄苦相櫻石髓青
精足養生嵇公援琴阮公哭虛負空巖長嘯聲

金魚池歌仿杜樂游園體

池邊風日足留賞曲水平隄暗菰蔣且駐巾車卧綺疏啟
扃拂簟楸枰響皎月樓開雲母屏商飈簾動珊瑚網紺殿
凌空青靄間步虛聲在青雲上飛汞煙沈道士鑪落霞閃

映仙人掌晝明金闕翠華臨池道清塵畏來往玳瑁魚斑
日應長枕在江湖盪蘭漿名園豈是金谷奢福地真如朝
川爽喜與諸公同賦詩讀騷痛飲良可師今朝美酒注深
爵明日殘花辭故枝仕宦京華得高會追歡勝景皆恩私
別後星河望渺渺將離贈遠遙相思更餘千載悲秋淚漆
髮丹顏非曩時

憩半山亭

曲嶺行人少孤僧獨靜居雲中炊火鬱竹裏出煙虛松老
惟藏鼠泉寒欲凍魚寺門猶五里且憩半山廬

送宋荔裳少參之任秦州

臘雪街亭滿何時到鞏昌關山尊底月斧鉞帳前霜閣暝
調鸚鵡花濃隱麝香出門憐舊伴白首尙爲郎

送胡循蜚由衡州左遷商邱丞

燕山積雪高三尺九月嚴霜天地坼與君長揖走風塵同
是西吳羈旅客獨憐坎坷仕宦途折腰偏向府中趨豪心
俠骨委成敗場中游戲呼臬盧來時衣帶瀟湘雨南國縱
橫亂豺虎探穴初耽衡嶽深覽奇更喜梁園古睢陽城邊
驅馬行才人遷謫易知名酒酣日落哀箏急淚溼青衫空
復情

華嚴菴小憩有懷南還諸子

菜陌瓜畦取徑斜空林宿鳥隱袈裟風敲霜壓西鄰竹茜
染梔勻九日花庾信似悲搖落早阮公休慟道途賒江東
已報收諸郡浪息銀河好汎槎

柬同年吳方漣侍御

長安暑退雨來初，隔巷清秋苦索居。
執戟長飢愁曼倩，杜門病渴卧相如。
十年兄弟干戈後，萬里生涯瘴癘餘。
正可從容謀諫草，治安惟待賈生書。

別梅杓司兼寄施愚山

吳苑煨鑪厯已殘，幽人時戴竹皮冠。
龜茲不改歌聲妙，牛斗猶餘劍氣寒。
金粉銷沈空響屨，溪山平遠待憑欄。
回看京洛賓朋盛，公讌詩成敵建安。

穀雨後二日過鏡檻小憩

春深喬木綠陰齊，北舍南村祇隔溪。
孤艇隨風獨來往，楊花撲過小橋西。

終南結茅歌贈本爾上人

薄游偶傍禪牀宿，靜夜同燃佛前燭。
天晴古院訪三支，凍

筆聯吟閣下詩拂臺翻經爲小住探奇卻愛山深處萬里
遙從閩嶠來一筇還向關西去眼前希見荔枝丹常有紅
泉碧樹看茅屋蒼涼人跡絕可耐陰崖六月寒永謝塵喧
樂長往商州風色偏蕭爽鸚鵡時依絕壁嘯王孫羣偵懸
藤上坐來日月石上生千仞終南冰雪清青鞋布襪計亦
得人間馳逐空浮名

孫鍾元先生北還夜話甯境僧舍

衛源留兼旬驅車卽云邁遲我一日行觀止乃大快移鐙
視鬚眉耿耿照孤介俠分燕趙風學疏濂洛派嘉遯獲安
貞筮得天山卦追遯萬厯年親歷幾興壞屈指數難盡披
髮見何怪所著宜名山流傳深足戒梗概紹劉楊元劉靜
修明楊
概山皆
容城人浮名鄙草芥靜觀去矜心龐公牀下拜

初冬同半千問旭靜鑑過訪掃葉清涼寺山樓

冶城幽寺卽寒村黃葉堆來晝閉門疏竹影搖通水色垂
柑實老綻霜痕天浮吳楚看明滅月滿江山自吐吞更與
虎頭添畫本長空帆影霧中昏

錢牧齋先生輓詞

入世雄心老漸灰昔年鉤黨競風雷俊廚何救東京沒刁
顧還從北渡來天爲文章留末路人推碑版冠羣材先朝
實錄尤淹貫多少微辭紀定哀

送孫無言歸黃山歌兼示王西樵彭鴻叟

甲辰十月游舊京蕭條旅宿聞爾名方冀惻款爲陳說慷
慨結客樓君卿長貧不妨用我法久客毋乃非人情故鄉
本在黃山下老松奇石形堪詫茅堂豁開無纖埃末俗塵

明倫彙編 家範典 卷二十一
十一
輾此焉謝誰寫三十二奇峯長歌短調風人風健筆摩空
洵奇絕驪珠出袖光熊熊少嬉草市鄉遙對溪南口山徑
藍輿古渡船止壓歸囊詩萬首謁來同泛西湖水每憶黃
山如夢裏酒樓長醉杜樊川丹爐休覓容城子勸爾遲行
姑且留仍教大隱栖邗溝山中故人達書問赤箭黃精猶
可求

周量賦詩贈行依來韻留別

每食無魚歎此身棲遲邱隴謝風塵秋垂野菊攜書卷曉
上寒潮拂釣綸伍相祠前多病客荆卿壚畔和歌人著書
忘老松鱗蛻醉倚瓜廬岸角巾

王士祿字子底一字西樵山東新城人順治壬辰進士

官吏部員外郎有考功集

詩話西樵爲漁洋長兄沈歸愚謂漁洋詩學所自出
漁洋序其過襄陽詩云魚鳥雲沙見楚天清詩句
之外引其從時世矜高唱誰識襄陽孟浩然指爲微
果堪傳一從謂刻集時佳句佚者頗多舉其濰縣道中
旨所在又謂聖胎此類尙夥蓋一門詩學固屬沆
云人煙通下密橋路繞東丹感輿云大人有賦言仙
意內景何方駐聖胎伯仲之間各有面目殆非漁洋所
能掩

寄季弟貽上

離居足憂端忽忽苦無憚睽違感至今提攜念在昔執手
既未卜所願眠食適頃者家郵至言汝資藥石置書坐沈
吟芒芒中懷迫移時取竟讀書言頗詳覈比當發使時汝
體業已澤恐爲虛見慰此意苦難逆叢雜緘牘未最後得
手蹟把讀語良符筆勢更奕奕終苦魂夢滑連宵役精魄
翹首望南雲安得雙羽翮送我置汝傍覩汝肥與瘠

次贻上用坡公東府雨中別子由韻見寄

客秋自汴上省觀維

揚贻上破檄將有珠陵之行僅對牀一宿乃與同舟至真州南郭而別此余北還贻上尙未畢役歸也今年春贻上用坡公東府別子由韻作詩見寄讀之凄然未及和答比在幽繫言念聚散感慨不能已已遂次韻寄之并示禮吉叔子

白沙洲畔樹年時記別汝歲晚江城陰風淒如欲雨去當南雁時不待雁同歸離居復多難徒爾思前期歎息重歎息兄弟等過客幾番約連牀歛若湘靈瑟秋來雁又飛題詩附爾行晨風零雨外脈脈十年情

長平坑歌

虎狼之秦胡不仁銳頭小兒服振振劫灰更促括也將一戰趙壘成埃塵白骨嶽積四十萬至今此地無青春丹河水繞發鳩麓指點當年趙兵衄土人往往坑旁耕拾得殘

戈或斷鏃鏃頭長以寸戈頭長以尺持將磨向丹河沙古
血猶腥土花赤省窵谷接武安臺南來遺跡仍崔嵬應共
觸骸山下月夜深同對鬼燐哀

飛龍宮行

唐元宗爲潞州別駕
時龍潛舊邸今府治

臨淄此地曾潛龍
倜儻頗有文皇風
夜半入宮星如雨
乾坤再闢成奇功
十有一祀帝業崇
耀武太原臨河東
中經上黨鸞雍雍
凝筳清蹕臨舊宮
眷言顧之擬沛豐
問疾賜酺歡無終
易以嘉號志所從
更聞金橋謠兒童
羊頭山翠當朝宗
勒兵三十萬旌旗
千里重陳吳作繪
燕公頌潞州別駕
堪英雄乾符坤珍
一十九并與茲邸
傳無窮龍虩降庭
蛇起陸龍入蜀江
作魚服雨黑延秋
烏語哀月明南內
絃聲促阿鞞凶狡
阿環驕何術豢龍
同豢橫漁陽塵壓
沈

香欄勿乃遙爲故宮戮噫吁嘻飛龍宮已寒煙三郎魂魄
何來還

詔罷高麗貢鷹歌

真人御極臨八荒百蠻九譯皆享王西旅之獒越裳雉貢
物各各因其方海東俊鳥好毛質鐵爪金眸猛無匹九都
作貢來天家特受鞬鏃佐罟畢瞭鷹臺上秋天高刈蘭驅
獸行蒐苗羽騎驂驪翠華至星旃雲罕紛周遭蒙鵬射熊
未足羨跋犀殪兕勞遮邀是時摘條試一縱萬人昂首瞻
青霄飛鳥狡兔失巢窟委身灑血填君庖至尊往往動顏
色玉蚪迴轡鳴蕭蕭柔遠猶然勤睿旨詔罷奇毛自今始
行葦兼存踐履慈苗葭漫賦春田美聖神舉動殊尋常此
事悠悠古誰比君不見蚪髯天子英雄人佳鶴猶遣懷中

死

八月十五夜

把酒邀明月清光徧薜蘿芙蓉秋水寂叢桂小山多一雁
歸湘楚繁星點絳河虛堂絃索靜獨和越人歌

憶萊子雜詩

時復尋春郭煙光縱目寬山姿濃大澤潮勢汨三韓小立
拋藤杖微吟側籜冠一樽石凍酒未厭海風寒

禾中作

江城還橋李望古一踟廚老寺裴休宅春沙范蠡湖遠煙
明渚烏斜日冷檣烏太息東流水年年浸綠蕪

故明景帝陵

景皇決策仗于公定變支危社稷功南內已殊淵聖沒絕

溝何意魯昭同玉魚殺禮虛幽寢以王蒼鼠驚人竄敗叢
莫向空山紛感慨十三陵樹各悲風

上黨

雄藩上黨古今名形勝居然未易京南睨河山全覺下宵
看星漢只疑平義陽千載仍祠廟夾寨當年劇戰爭足底
黑雲天下杳幾朝車馬赤霄行

贈張箕山學士

銅龍曉色破層陰羨爾批鱗意獨深言聽便爲天下福計
違不負一生心他時烏奕看青史此日輝光燭翰林我亦
握蘭東省客浮沈徒愧二毛侵

賦得丹鳳城南秋夜長

丹鳳城南秋夜長關河寒近落微霜那須錦字論長恨自

有清礎教斷腸
破衲沙頭鴻欲去
拂雲堆上草初黃
傷心不及城邊月
猶照盧家玳瑁梁

庭梅

索笑憐窗曉
流光照砌春
那須江上見
宛似弄珠人

石門縣

落日石門路
語溪明夕波
女牆纜幾尺
一半入藤蘿

絕句

記得佳辰弔汨羅
客懷長晝費銷磨
榻來夕院愁如洗
爲聽蘭娘一曲歌

題龔半千畫爲周櫟園侍郎

石門積雨黯層巒
鴉路蒼蒼萬木攢
爲憶秋風吹老屋
孤情著意寫荒寒

王士禛字禮吉山東新城人監生有十笏草堂集抱山

集選

王漁洋曰余兄弟少讀書東堂皆好爲詩先後成進士去獨仲兄家食以老有詩數百篇暇乃擇三之一刻之曰抱山者兄少日所居堂因以自名其詩蓋取諸孟東野句云詩話五言小絕導源盛唐摹形者病神合者難順康之問猶沿古製琅邪羣從特標雅音觀漁洋選仲氏詩斯體爲工殆與微雨過青山蕭條秋雨夕諸篇同一得髓也七絕好作俳體則遠遜矣

登望京樓

巍巍樓閣倚雲隈
占斷春風百尺臺
東去錦帆淇水合
西來爽氣太行開
如新棖柁存丹艸
極目煙霞點綠苔
莫上望京樓
望遠黍離麥秀使人哀

微雲移時月出

乍散還乍聚
疑煙復疑水
清光出雲中
皎皎如初洗

南池

勞勞任城道渺渺近南池亦欲吟秋水爲慚老杜詩

清涼洞

始皇曾避暑四閣望依然欲縱登臨目空愁雨雪天

松

老幹化蚪龍賞心惟勝友年來鬚鬢斑宜伴支離叟

百泉

瑟彼百泉流洋洋入淇泚風動碧波紋荷花香出水

蘇門山

遙望蘇門山隱磷多幽致青林間白雲晚照含蒼翠

嘯臺

長嘯人已邈餘音振林麓世事笑莫談嵇阮有高躅

德州河上口號

曲岸臨大河風帆日千里迢遞遠鄉人離心託江水
思鄉與懷古望遠臨江樓長歌指飛鳥風起蘆花秋

王孫蔚字茂衍臨潼人順治壬辰進士歷官福建布政
使湖廣提學道僉事有輶香集

詩話茂衍舉於鄉初已定元後改置第二及廷對在
陝西爲第一又不得館選自刑部郎出守府擢閩藩
復左授川東兵備尋視學湖廣卒於官茂衍孝友
端亮詩格高音雅與李天生王幼華在伯仲間

秋江吟

輕舟如馮虛江碧峯影倒寥宇無塵埃晴光動菱藻幸因
歸櫂閒歷此湖山好寓眺日夕殊佳景恣幽討向暮下江
城霜碁處處擣時序已如此我顏得無老楚山風雨來一
夜白秋草

與友人山中夜坐

偶然緣水岸落日見幽棲野暮煙藏寺山空月過溪結籬
松磴下借樹草堂低明早如無事披雲更杖藜

與石徽音飲酒

閱世亦云盡如君未易遭交情今管鮑俠氣古荆高霜落
鐙前劍花飛夢後毫肯拚傾倒興不惜鷓鴣袍

將至應山

前山將入楚秣馬識曾游風土漁樵舊江村父老留苔沈
宋玉宅日照鄂王樓眼底飛鴻在還須鄭俠謀

初發里門留別

年年高卧擬柴桑何事驪歌動別觴鷄肋浮名勞去就鹿
冠微願惜行藏征鞞漸欲登山路迴首何能忘草堂作客

更從今日始二陵秋色正蒼茫

賦贈盧司李

薊門相對故人情同拜新綸事遠征明月一輪巴子國秋
風匹馬鄂王城羞言桑孔多心計舊識于張有盛名他日
江天遙憶處黃磯白渚楚雲平

秋赴長安途次晉中雜興

行人去去復青山策馬西風了未閒碧草難尋綿上隴白
雲何處雁門關三更曉角來霜裏一片秋聲在樹間此際
蕭森愁欲起不緣客路亦潏潏

江行雜感

纔離越嶺又吳湄寥落江湖憶故居感憤千秋鸚鵡賦雅
騷一代鷓鴣詩籬栽黃菊知今是路入桃花自古疑乘興

莫停明月櫂，朝川山色待王維。

芙蓉山色有無間，煙櫂蘆花千里還。
遠澗寒聲移晚樹，晴江落照上秋山。
逢人盡說風塵苦，出世方知雲水閒。
昨夜終南來夢裏，宛然三徑扣松關。

早發峽石驛

西巖馬首向層霄，秋樹平明煙未消。
寂寂空亭人不見，霜吹紅葉過山橋。

湘行絕句

暮歷湖雲淡帶煙，漁燈明滅大隄邊。
風聲夜半幽篁裏，疑是湘靈廿五絃。
萬里晴江落照遲，琵琶峯下小舟移。
楓林日暮寒鴉影，飛入長沙賈傅祠。

程可則字周量號湟溱又號石隴南海人順治壬辰會

試第一歷官桂林知府有海日堂集

詩話周量壬辰試南宮冠多士乃以磨勘不得與殿
試越十年試授中書應戶兵兩曹出守桂林當官敏
幹有聲於時沈酣經史一發之於詩歸愚稱其詩俊
偉騰踔聲光熊熊品在公敵玉蚪鈍翁諸公之右

舟晚

迴舟轉清澳落日照前岑水闊一帆遠雲歸衆壑陰蟲聲
喧別浦人語靜空林寂寞河干客悠悠行路心

送徐庾清錢柏園歸越

良會竟難永歲寒人盡歸誰憐故鄉子獨采南山薇把酒
不終夕浩歌徒攬衣無能挽舟楫惻惻對斜暉

虔州

章江迴合女牆低不見行人但鳥噉往日聊城誰射矢至

今函谷未封泥風吹敗葉沈沙礫日落前營動鼓鼙欲向
鬱孤臺上望亂雲含雨草萋萋

度雙脾峽

虔州南上路巔峴忽到雙脾水氣昏帆向夕陽爭鳥道天
留孤塹峙江門沿洞百折灘聲急明滅千峯樹影繁谷口
似聞雞犬喚人家疑是武陵源

送魏子存司理成都

誰說蠶叢不易行春風三月馬蹏輕銅梁舊枕秦山險玉
壘新連楚塞平芳草綠齊過漢水杜鵑紅盡到綿城知君
篋底多詞賦論蜀文應似長卿

題趙承旨擊鞠圖

至元一幅鵝溪絹四尺不滿三尺餘翰林承旨頗好事繪

取擊鞠爲斯圖不知王者是何代紫稜白面蒼虬鬚手提
青絲綠玉策據鞍顧盼神睂于左右布列數猛士銜竿挾
杖紛騎驢一球委地不得撥四面擊者羣爭趨驢蹶驕蹶
勢欲動蹀躞騰還精神殊我聞軒轅習武士沙蟲猿鶴皆
前驅一擊能令力牧怒蚩尤涿鹿功煌如吁嗟王孫際龍
戰繪此毋乃含歎歔方今海寓盡混一虎皮蓋藏金僕姑
雲門旣奏泰階平縱有筑鞠非兵符此圖不用示天下只
合簡册供清娛銜竿挾策胡爲乎

曉起與鄭無傲作

長安四月雨霖霖生微寒晨興出簾閣稍覺衣裳單鬱鬱
庭中槐淺綠浮林端好鳥鳴相聞彷彿棲巖巒不見夏雲
熱甯知春色闌賴有同心人把臂延清歡回首思故鄉衆

卉萋以繁黃梅摘方熟朱荔誰當餐嘉序長不歸誰能假
羽翰

吳漁山爲余做營邱早雪圖

漁山山人不出山場來燕市仍鍵關含毫潑墨自怡悅爲
我披豁開心顏鵝溪一幅營邱似積素凝寒半江水殘條
拂地凍欲僵有客孤舟去如駛蘆葉蕭蕭風亂飛千山寒
色兼斜暉此翁掉頭頗解事天地已閉人當歸不然訪戴
意亦適歲寒蘭芷應須惜多謝山人冰雪心挂帆好向羅
浮宅

沈荃字貞蕤號繹堂江南華亭人順治壬辰一甲三名

進士授編修官至禮部侍郎諡文恪有充齋集

詩話宣德中雲間沈民則民望兩學士以書法得名
世稱大小沈學士繹堂爲小沈學士齋亦以書法受

如於景陵碑版流傳後先輝映
詩春容安雅盛世之音瀾瀾如也

曉渡揚子

曙色初開揚子渡片帆遙挂海門西橫江曉霧千峯失隔
岸寒雲萬堞齊短棹蒼茫漁浦外長天縹緲雁行低中流
倚權頻回首吳楚山川極望迷

同徐甯菴憲副席竺來太守榮河秋望

西風獵獵動寒波滎水相逢一浩歌廣武秋陰迷舊壘太
行晴色下長河黃蒿斷岸奔流急野寺疏楊夕照多蕭瑟
那堪風景異高天極目雁行過

清源懷舊

晨雞啓重闌城柝亦未綴解纜乘細流輕橈向曉發淒淒
下微霜皎皎鑒寒月惆悵問前途鬱紆感逝節回首溯舊

知音微已滅沒眷德思偏長懷分情難歇虛期萬里風徒
槐中流楫十年過西州悽愴心如結

送張簣山學士歸廬陵

襆被蕭蕭出鳳城雲霄極目重含情片言豈詔回天力三
宿仍辭去國名聖德優容昭日月臣心愚樸本平生曲江
風度應相憶莫戀空山猿鶴盟

耿介字介石號逸庵登封人順治壬辰進士改庶吉士

授檢討歷官少詹事有敬恕堂存橐

詩話逸庵自詞林出巡閱贛後移畿輔所至皆有惠
於民乞歸養母躬詣蘇門受業於夏峯遂以昌明正
學爲己在湯文正長春官詔兼詹事薦起逸庵爲佐
逸庵見道不能行復謝病還里與門弟子講學無忿
容矜色登其堂者如坐春風中
詩亦和平溫雅爲有德之言

八月十六夜宴盱江樓得白字

江城霽夕暉層閣凌百尺冠蓋會羣公對此秋月白豈敢
耽歡娛良時亦足惜下見江水深澄涵一天碧細火通漁
艇連櫓聚商舶潛鱗吹波瀾宿鷺依沙磧爲政無煩苛民
物各自適冉冉江上楓青青嶺頭柏願將孤月輪皎潔比
心迹

都門送周亦大同年

晴色照行旌鳴鞭出鳳城三年風雨意兩地別離情露白
秋江遠煙消楓樹晴奇書中祕在須早侍承明

由南平至閩

茶洋六月放舟還水竹千重咫尺間龍抱石根翻急瀨天
憑溪力割青山人煙幾處聞新哭柳色經年憶舊攀爭似
登江垂釣叟一竿無語伴鷗閒

嵩陽書院送寶敏修先生

古道於今歎式微
臨歧執手更依依
山靈似有留行意
一片停雲人不飛

管重光字在辛號江上丹徒人順治壬辰進士官御史

有江上集

詩話江上劾明珠余國柱直聲震海內棄官而隱或
言爲隴中道士工畫爲世所重詩自然清雋有句云
只因鳴遂斤不道直
難容可見其懷抱

飲張湘曉吏部鶴林別業

讀書曾愛杜鵑樓
霜葉紅時坐未休
別後煙霞常入夢
重來松菊正逢秋
欲尋老衲精藍改
話到青山白髮羞
好是結茅鄰仲蔚
不教城市隔林邱

山中雜詠

白髮驚時變青山見鳥飛暑隨桐葉減秋向薜蘿歸細草
侵芒屨新涼到葛衣自憐垂老日方悟昔年非

舟泊河干

山雨懸春樹江春入郡樓人家依岸轉河水抱城流自信
千時拙誰含作賦愁煙波時極目吾意在滄洲

答宋中丞牧仲

憶昔宦游日匡廬愧使車歸來三十載未致一行書清興
因貧減顛名爲病除多公持節鉞猶及訪閒居

偶題

銀箏玉柱拂晴霞紅燭金尊照鬢鴉不是潯陽江上客莫
將雙淚落琵琶

楊素蘊字筠涓號退庵宜君人順治壬辰進士官至湖

北巡撫

詩話笥眉初令東明招撫流亡在縣三年增至萬餘戶舉卓異入爲御史糾平西驕悍謂當防微杜漸外遷川北道平西辨前疏坐罷歸及平西變作復薦授郎裏道累擢至專圻自安徽移湖北值年饑疏請蠲賑時已病亟乞休吏議責以不親勘災坐奪職蓋不知其實病未幾卽下世

山居

高秋孤杖倚雲間坐看溪光卧看山白雪風翻驚疊浪青苔雨溼出層斑羣歸倦鳥飛飛急對浴輕鷗泛泛閒欸乃數聲天欲暮漁舟輕帶夕陽還

飛樓縹緲枕河湄繞屋羣峯列嶂隨雨脚每從晴外見灘喧翻與靜中宜稅完胥吏甯過舍野放雞豚偶到籬不學武陵深避世漁舟停櫂莫相疑

張永祺字爾成大興籍宜興人順治壬辰一甲二名進

士授編脩厯官大理寺少卿有金灘倡和詩

詩話爾成嘗與施愚山王漁洋同官倡和然非其匹也昌黎論文取文從字順詩取妥貼排募言從順妥貼之難也金趙閑閑論七律謂非讀詩三千首功力深至不能圓轉如意爾成諸體詩於押韻選言間有未盡妥貼之處

送胡存人南歸

握手談今夕離情已黯然師恩深自責交態畏人憐別酒風前路孤吟日暮天停鞭聊極目江水迴浮煙

送爾執北歸後悵然有感

鄉關攬轡客心驚薄暮空林倦鳥鳴婚嫁向平雙鬢改酒棋謝傳一身輕桑乾雪映千山曉易水霜流萬壑清話到微醺官舍後膝前兒女倍含情

和釋堂送顧菴南歸原韻

僧房長夏反離騷
燕市狂歌飲濁醪
野水沙鷗迎畫舫
澄嵐翠黛識宮袍
思歸媿我荒三徑
頌酒知君藐二豪
到日攜筇清興適
白雲紅樹兩峯高

金灘賦贈邵凌玉學憲

河畔春風解纜初
故人相向漫欷歔
握中十部名山業
篋裏三年秀水書
地近揚雄時問字
途臨阮籍一迴車
桃花水繞漳河去
尺素東來寄鯉魚

丁思孔字景行漢軍旗人順治壬辰進士改庶吉士授
編修官至雲貴總督

題畫壁和毛秋岑韻

秋水蒹葭闊孤舟
自往還好音酬去
雁清響答空山
垂釣煙波裏
言懷杯酒間
幾人有清趣
心與境俱閒

項景襄字眉山秀水人順治乙未進士官至兵部侍郎

南屏

蕩艇入南山晴湖淨如拭繫纜枯樹根寒煙生微白偃臥
周山阿腳步層巖隙方丈出松巔亭亭高百尺入門逢老
僧塵纓頓若失說法水月心妙香浮廣澤落花滿空林披
雲坐磐石置身在霄漢庶以慰營魄安得常如此元言共
朝夕月出竟忘歸零露沾衣溼

題畫

閒來結得小茅亭但識煙雲月露形
歷日不書藤葉紙年年只記柳條青

張可前字蒼漢江陵人順治壬辰進士官至兵部侍郎
有宛在軒詩集

新昌縣寄朱啟宇

負郭三家市窺城萬木村水春喧雨急山燒入雲昏露草
蛇盤徑風林虎嘯門何時荒僻地歸與故人論

傅感丁字雨臣號約齋錢塘人順治壬辰進士官至副
都御史有舒嘯軒集

登海湧峯

昔聞虎卧此高邱今日登臨最上頭近接靈巖惟片石遙
觀雪浪有孤舟消沈伯業同煙草寂寞禪心視水漚劍窟
泉飛石梁北聲隨香梵幾時休

郭棻字芝仙號快圃清苑人順治壬辰進士改庶吉士
歷官內閣學士有學源堂集

春暮張爾成捕卿招同李書雲余銓盧王北山三給

諫摩訶菴看杏花

破懶尋春遠招攜石竺間興高卽暇日地闢况禪關樹裏
千聲鳥尊前一帶山登樓憑眺遠不負此官閒
野曠春逾媚林煙綠一團遠公容設酒曾點未成衣坐樹
鶯聲老蒸田水氣肥閒雲如有意故故傍人飛

劉木水由代州州貳擢守遼陽州

五馬原侯秩三韓况帝鄉風能清代郡才可問南陽海氣
榆關紫秋花鐵嶺黃三年屈指是粉署待含香

迎薰亭侍宴

太乙波明影碧霞斗牛星畔泛仙槎百壺湛露聖人酒十
里香風君子花蛺蝶過船吹芰粉鳩鵲出水帶菱芽銜杯
四望歡無極身在瀛洲第一槎

贈程穆倩山人

廿載懷君老始逢，瓣香不枉爲南豐。
縱談身世悲桑海，屈指知交歎雪鴻。
酒國有人堪獨往，硯田無種與時窮。
千秋早晚徵耆舊，莫掩邗江半畝宮。

嚴藕漁宮贊假歸無錫

瀟灑抽簪出鳳樓，春風人上木蘭舟。
一編青史垂行藁，十載紅塵浣素裘。
去日鶯花憐滿目，到時江雨漫回頭。
長安老友無多在，走馬蘭臺尙滯留。

別曹秋岳夫子十稔偶于晉陽拜晤感而有賦

左官次第買歸航，回首青門已十霜。
元鳥尙留龍馬塞，逐臣敢負芟荷裳。
且將世事浮桑落，況有文詞動柏梁。
爲憶髫年環絳帳，幾何雙鬢已蒼蒼。

春日張永舒太學招同李湘北學士王北山給諫杜子靜宮允張南溟比部雅集遜園次韻

正欲降愁部酒兵銜杯爲愛遜園名舌存未許談時事心老纔知淡物情小鳥爭來高閣噪新花還向舊枝生爍魚易釀皆鄉味不羨張翰蓴菜羹

劉山人游中州憑寄張上若同館

輶車憶下午橋莊痛飲醍醐月正霜白髮我猶歌偏仄青山君已定行藏淦河春雨駢麟浴行塢秋煙薜荔香滿眼干戈憑問訊金臺客老意蒼茫

余縉字仲紳號浣公諸暨人順治壬辰進士官御史有

大觀堂集

詩話浣公宰封邱奏最第一入諫垣以敢言稱其齋居苦雨詩卽以民生爲念宜其出爲循吏也

曉起聞鐘

偶出聞晨鐘云自湖南寺南望不見湖惟見湖中樹渺渺
水石間因風時一度何當月明中汎舟尋湖嶼

北固山晚眺

石頭城東煙水空金鰲夜吸海底紅天吳嚙斷白玉虹渴
猊怒攫青芙蓉中流幻出妙高峯浮濤拍浪將奚從似欲
渡江隨六龍

癸丑夏日齋居苦雨

蠡城五月雨絲密溼雲壓檐黑如漆街頭到處水繞門路
上行人泥沒膝舟子艤岸如蠣房兩月何曾脫蓑笠上年
秋漲淹禾苗農家比戶吞聲泣賣絲糶穀望今年誰道夏
霽甚疇昔一片洪濤浮太清天風未吹海已立薶麥方熟

盡生耳陂塘總決江湖一侵晨插秧水浸畦薄暮歸耕船
入室盎中粟罄婦兒嘯官吏催糧如火急賣男貼婦安足
悲時有翼黃當見恤

舟次山陽

燕將雛舞柳棉飛浪湧漁舫鰕正肥淮酒初濃梅雨暗吳
蠶方老柘風微農緣輸賦田疇薄官善征商估客稀惟有
野人無逋課市橋長載月明歸

王廷璧字崑良祥符人順治壬辰進士授刑部主事歷
官陝西涼莊兵備道按察司副使有聚遠樓詩集

秋日飲李相國園亭

山容全入畫老樹動秋香露葉螢光溼風巢鶴夢涼茶煙
生暗竹酒氣靄迴廊莫擬平泉侈盧鴻一草堂

刑臺

塵土彫殘客裏顏
馬頭隱約見雄關
草蒸溼綠長煎雨
雲插空青欲占山
流水遠通寒棘外
小橋孤卧野花灣
季龍宮殿知何處
惟見蒼苔點石斑

燕市有懷惟度魏子

時客楚南

酒散繁臺雁影單
十年客夢老漁竿
長鏡杜甫沿山斲
短鉢馮驩帶月彈
回首滄桑皮骨盡
傷心湖海鬢毛殘
傳來戰火三湘滿
何處梅花續舊歡

李昌祚字文孫一字來園號過廬漢陽人順治壬辰進士
歷官大理寺卿有真山人集

魯峯別王汾仲

搖落鄉心屬暮秋
王郎眞合古人求
終宵對月燒茶竈
竟

日臨江上酒樓雁外山低黃葉路日邊帆去白蘋洲江流
漠漠天如水圖畫何曾盡別愁

劉必顯字微之號西水諸城人順治壬辰進士授行人
司行人歷官戶部員外郎

題槎河山莊亭壁

十年塵夢冷漁磯又向灘頭理釣絲久客乍歸鷗作伴短
牆半缺水爲籬月明松影窺窗際夜靜溪聲到枕時獨坐
悠然成大覺挑鐙拂壁一題詩

葉矯然字子肅號恩庵閩縣人順治壬辰進士授工部
主事改樂亭知縣有龍性堂詩集雁唳篇東溟集

山海關

神州鎖鑰古雄關鐵騎雲屯重此間一自六龍興朔漠頓

飛萬馬下燕山樓船瀚海滄波壯烽火邊城白晝閒多少
征人罷遠戍深閨幼婦莫愁顏

碧山銜照映邊牆匹馬臨關道路長中土哀鴻輕出塞南
冠罽雉泣投荒一城碇杵當秋急八月風雲匝地黃最是
居人閒指點紅花十里幾迴腸

立夏日雨中集城西書院

鷓鴣逐子伯勞飛天淡雲濃夕照微勸汝東風一杯酒明
年春色早言歸

張潛字上若磁州人順治壬辰進士改庶吉士有讀書
堂詩草

寄殷宗山

烽煙不到地歲月任逍遙飲猶嫌水臨風欲棄瓢千峯

供杖履一代見漁樵應共巢居子雲根劇藥苗

張晉字康侯號戒菴狄道人順治壬辰進士官丹徒知

縣有黍谷秋舫一嘯薊門勞勞石芝稅雲諸集

詩話戒菴詩縱橫凌厲出入風騷少年成進士謁選
宋荔裳備兵秦中贈以詩曰才子半爲吏如君方少
年一時驚綵筆百里聽朱絃雨雪關山道音書鴻雁
天梅花春信好寄我上陵篇葭露蒼蒼弓刀客子
裝秦風餘騶曠漢使重呈郎擊電徠天馬彈琴下鳳
凰定蒙宣室問災異說組桑旋令丹徒充鄉試同考
坐吏議年甫逾三十遽卒戒菴旁通
音律有琵琶十七變世猶傳其譜

秋望

家世崆峒山下居每因風雨念吾廬魚龍水落霜來後鳥
鼠秋高月上初慈母手中千里綫故人雲外數行書經年
未忍西南望知道青松久笑予

報國寺

勝地開金刹諸天近翠峯月高秋在塔雲冷晚留松往事
存題碣前朝剩賜鐘一聲煙外鶴落盡蒼芙蓉

河上

步屨向汀洲殘山望眼收雲歸藏晚堞柳斷出晴樓古寺
藤煙夕荒灘蓼水秋平沙看舊雁落日更生愁

春寒

寒雲殢小溪樹樹鎖煙低二月春將半孤村鶯未噉花牽
新水細山背夕陽迷莫恨湖光冷東風自不齊

楊端本字樹滋號函東潼關人順治壬辰進士官臨淄

知縣有潼水閣集

詩話函東生明季值歲饑兵起詩多憂時愍禍之言
其音促數其辭質直所謂亂世之音入國朝登第入
宮詩本漸
諸利雅

春暮

惜春春暮燕飛斜日坐園林玩物華井上舊垂金綫柳階
前新植玉蘭花逐貧不作揚雄賦解渴時烹陸羽茶何用
買山逃世外萬竿修竹自煙霞

憶曹禹疏

余家渭水南君家渭水北盈盈渭川水相望兩岸側君令
泰山西余客泰山東峩峩泰岱山巉巖橫其中昔望渭水
波今望泰山巔夜夜海邊月朝朝山外煙

秋聲

秋聲來何處竦聽情思怯四顧寂無聞微風生梧葉蕭颯
林木鳴萬籟音相接浙瀝數點雨雲激山嵐沍作賦歐陽
子爽然秋意慳

湖暮

倚檻湖方暮，山橫翠飛水。浮雙塔，動樹擁亂雲。歸饒鼓，喧迴櫂，笙歌沸落暉。鐘聲來遠寺，隔岸響微微。

顧亭林卜居華山

谷有圖南卧，卜鄰古洞幽。蓮開猶十丈，松老自千秋。捫蝨應難識，翔鴻未可求。不須丹詔至，野性白雲留。

仙娥溪

川迴大壑雨冥冥，十里嵯峨拱翠屏。溪水桃花流不盡，仙娥山外數峯青。

曹同統字能紹，號容庵，巢縣人。順治壬辰進士，授懷慶推官。歷官東昌同知，有容庵詩集。

中牟晚道

日落煙沙白，荒荒野色微。
村寒牛影瘦，天闊雁行稀。
蹀躞衝風至，鋤農荷月歸。
此邦三異蹟，默爾念前徽。

陳維國字大治一字坦山，武陵人。順治壬辰進士官信。

陽知縣有坦山人集

詩話坦山孝於親，寇至欲殺其父，引頸求代。寇兩釋之，宰信陽有惠政，乞歸平西之亂，就常德試士。徵坦山主試，辭不就，使封劍迫之，祝髮入山，終不汗，僞命卒年八十有六。

客濠州別楊小陸

只此兩狂客，空山喧酒聲。
長年別好友，竟夕慰深觥。
松傲霜前色，梅孤雪裏情。
尊中無限意，明日是歸程。

桐城晤胡渚叟明府

一縣煙嵐合，山城吏似仙。
閒情飛鳥外，公事落花前。
偶和詞人句，頻酬酒客錢。
蕭疏誰得識，坐月靜鳴絃。

趙鼎字魯眉號長公萊陽人順治壬辰進士官萬年知縣有憲堂詩彙

晚泊天門山

孤舟逢日暮晚宿傍山青寒月三更出長江一帶明病中添客淚夢裏落潮聲何處棲飛鳥蕭蕭萬里情

戚藩字价人號蘧庵江陰人順治壬辰進士官安定知縣

靈隱寺

策杖行過舊虎林翠屏深繞萬松吟寺連滄海朝煙白塔入澄湖夕照陰猿父呼來都解頰牧童歌去已忘音喜逢支遁拈花示響答鳴泉處處心

晚晴移詩匯卷二十六終

晚晴詩匯卷二十七目錄

黎士弘 二十二首 許泌 十一首

吳綺 十四首 梅清 十二首

查詩繼 四首 曾畹 七首

王澤宏 二首 羅爲廣 一首

林堯華 一首 李璿 三首

陶憐 二首 孫中象 一首

陳忱 一首 蔣玉立 二首

陳斂永 一首 田種玉 一首

徐旭齡 一首 圖爾宸 二首

史大成 二首 楊雍建 一首

李贊元 二首 孫光祀 二首

劉芳躅 一首

慕汝楫 二首

張惟赤 一首

梁熙 七首

張注慶 一首

周宸藻 二首

傅辰 一首

丁彭 十首

劉體仁 三首

劉元徵 二首

李繼白 一首

邱象升 三首

楊繼經 三首

曹申吉 三首

梁儒 二首

馮雲驥 八首

戴王綸 一首

陸求可 二首

胡在恪 一首

張聯箕 二首

紀元 一首

楊應標 二首

朱孔照 一首

張錫懌 一首

錢黯一首

于鵬翰一首

蔣中和四首

董含一首

王揆二首

王撰三首

盧廷簡一首

晚晴筴詩匯卷二十七

徐世昌

黎士弘字媿會長汀人順治甲午舉人由推官歷官甘肅布政司參政有託素齋集

詩話媿會長於吏事在塞上入年怡軍書每至達旦

功成引退當世高之少游李元仲之門稱入室弟子生平著作甚富人謂其文未嘗步武前人而動與古會詩格屢變大都刊落浮言情真樸老異於以鞿轡者爲工

登虔州塔頂同朱具臣南昌游雲生

登臨緣分事吾自偶然來孤遠蕩聞見高危驗膽才長風
牽壁立眾樹領江迴煙積山如幕晴吹次第開

佛祖峯山寺坐月

錯繡諸峯夜色安煙光樹氣積高寒蒼茫星漢容人立喧

寂林巒共佛看涼月有懷成獨笑清宵無累況登山紙屏
細坐幽如夢何處幽香滿一欄

石鐘山

癸卯四月時送仲弟宣巖之任壽春

雙鐘峙中流高低互相位微風吹水波萬竅各鳴嚙仰觀
造化心雕鏤亦爲罪濯濯蘇眉山捉筆工點綴放舟絕壁
下領意得奇最子弟與山川韻事足圖繪夷考作記年送
子德興尉余來涉江濤別弟趨吳會古人今不殊事跡偶
相類離懷雖黯然妙得山水對西風泥行舟遂謀三日醉

大言

小心事貴人眉睫博意氣巢由拜馬首士亦各有志呼來
坐堂下微筦煩願視環指座上客是子覺稍異三公間九
卿勉矣行自致馳歸語細君此是親傳示

莊生未聞道李耳故疎脫干將不示人鉛刀稱善割古來
青塚上誰爲表清濁彼哉柴桑君孰詩詭寂寞公田忍不
收乞食徒取薄

馬安稱巧仕潘生嗟宦拙萬物各枯苑造化何區別達士
賤權奇名花厭高格蟋蟀知風寒鴻雁知霜冽泛泛水中
鳧稻梁謀亦得

花發大堤西花發大堤東策馬誰家子蹀躞凌春風行道
各借問名父忝上公鬱鬱守貧賤執鞭甘所從

永新道中卽事

河水細如線峯峯見兀碑散石亘中流奔雷喧日夕山寒
鳥不飛微雨灑衣溼牽纜百尺高隔樹明人跡薪煙望目
勞羣虎見跳擲長吏本涼德敢怪爾充斥四顧井邑荒吁

嗟悼行役

下水苦逆風上水苦凍雨兩凍手足僵竟日行十里岸花
歇眾芳磷磷見水底勉力事宵征眾聲合邪許孰知舟中
人心更勞胼胝一官不自愛致身等腐鼠空歌行路難艱
辛用自取

一山一山過細雨嗚嚶嚶西風號四野壯士安能豪嵯峩
望城郭中多蓬與蒿雞犬不聞聲燈焰空寂寥老母隔江
城兒心中夜勞仲弟陷文法意外生波濤日遣兩兒去急
難京華路會與少弟見有淚如何注念之摧心肝焉得生
羽翼不如顛倒卧庶幾忘百慮未明起披衣殘月猶在樹
印無數

戊子西江兵變十一月始平廢印數百留南
昌署中哀強人之不義也爲作印無數篇

亦何纍纍亦何輩輩大者丞相尙書御史大夫章細瑣參

軍丞簿尉大笥小篋聲琅琅還想當時盡朝貴書生白面
朝典銓夕捲黃河擁高旆豪奴千指坐索人巨室高門閒
過醉一丸已墮睥睨牆燒燭侯家方嫁妹楚猴雖沐冠常
裂春秋大義應書賊豈有中心事主爲國恩日日雕銅分
暴客生不足憐死不惜陰風吹滿秋燈溼狼籍頭顱雜土
飛獨餘廢印高屋脊

書來家弟遂已破賊大橋爲志數語

南塘小兒弄兵戲抹額紅巾等山魅夜切人肝作脯甘對
裂輕繪如破絮殺人不死還等閒隨上軍門求補吏山中
日日報揭竿百道軍書勒簿尉簿尉何能令請行牙兵幾
隊趨山際昨日書來珍重看云已破賊數十輩留之不可
誅不勝細作爰書別黨類我聞此語心獨歡賢者甯不當

如是嗚呼作賊不死死者寃民不作賊將徒然

己亥小寒走筆贈古林和尚

不見吾子十年矣子來遠渡西江水拜子顏色爲子歡遂能解脫了生死憶昔追隨全盛日破壁短檠同吮筆規模

賈董公孫書指點雲煙酣六籍其時吾師楊長公叔同里

沈若陳錫俱勁敵與叔胡生三十強摩空作賦徐庾匹各

各心矜吾子賢退讓不敢齒行立子家簪纓牀滿笏羣從

諸郎廟廊屬子獨游跡掃朱門滄桑彈指逃空谷賢者所

爲不可測學孔學釋非兩截大地應須截鐵人能穿虎豹

探龍穴往事陳言空浩浩選佛歸來年尙少老大還念嫁

時裳我爲子語子應笑三生石上靈巖山欲得從君覓領

要

題于慧男集藥地老人畫幀

前年曾見壁上山去年又看卷中樹道人邱壑自胸中水
水石石紛無數使見所夢憶所歷歎者得息迷者悟青原
山上山如簇何嶺何峯是其族我未入山見道人欲向此
山先禮足譬如問鯖詣五侯纔過屠門已果腹春音居士
殊高致抗首風塵仙作吏前身要是白社人乘閒便入青
原寺又乞五嶽留真形道人潑墨供遊戲我欲問君假此
圖沿溪處處咸相誌他日入山或不迷不止盤礴領其意
舟過建武夜行

不住因風好能爭半日程船燈敲石火人語渡河聲月上
千峯立霜深一雁鳴經年南北路多半是宵征

貴溪小隱巖

出郭無多路，斯山遂覺深。四時全雨色，長夏逼秋心。野饌分僧供，殘碑與客尋。誰能容小隱，弭節媿登臨。

至南昌知周先生無恙且得手書庚子五日

到門驚喜公還在，痛定開函淚更流。萬死纔回明主顧，孤兒猶囑故人收。眾中薄命誰能惜，意外微生荷獨留。誤盡閩南碑下客，無端北望哭西州。

九日同集蔡翼皇太守來青亭

絕勝亭臺見遠崗，相將高處待重陽。幾行濁酒澆槐冷，盡啟疎簾讓菊香。人在他鄉知友重，客當佳序附官忙。竭來脫帽狂從事，手劃銀河數漏長。

九月晦再至南崖

是曾經到還如乍，置我真宜邱壑間。馬上得全看樹色，月

中記兩入秋山快遊盡興懷纔滿塵事經心悔欲刪勾漏
沙牀他日約一峯一石與迴環

送別施愚山先生

先生七載湖西住到處人能說使君酌水自編良吏傳扶
風新散講堂文半江煙雨催歸棹一日星辰渙小羣同在
他鄉仍惜別相思囑寄敬亭雲

來甘州一載矣尙未紀其風物夙昔交遊問貽雜至
特作六百字寫懷用柬知我

萬里黃河飛一線五州碁錯東西面

蘭州渡河而西爲武威張掖酒泉嫩煌四

郡大旗日落照孤城畫角聲低迷故縣秦人百二誇山河
明駝驥馬羌唱歌破水淙淙石齒齒祈連千仞高嵯峩白
頭父老說前事舉邊還指戰場地射殘鐵鏃半段鎗得來

換酒謀朝醉馬蘭首蒼生沙州荒郵短驛連古溝四月寒

山催種麥風高六月猶披裘夾道鱗鱗見番族放馬滿山

羊滿谷天巴歲歲說防秋未必飲河能果腹

番族舊屬西人歲索牧畜

名討天巴邊上防其出入河西僧人著黃衣蟻蜂經卷銀字肥吞針羅

什不長見斗室維摩仍有妻或云此輩便其俗要使羈縻

壓荒服時平不問燕雀安防微深恐鼠蛇伏前年草地紛

請求閉關卻謝誠良籌豈可鴻溝割項羽甯容子敬分荆

州前西人請界廟堂勝策堅壁壘得使激瀾安弱水曾無

佛骨與仙才來束單車結雙軌

弱水離山丹十里古縣名剛丹書生落落

眞自豪一斗伊涼笑爾曹朝來起看雪山雪夜卧貪窺星

漢高甘州四山積金瓶新摘青粿熟萬顆勻圓薦紅玉

梨

熟者曰金瓶穀早登者曰青粿葡萄一種曰公長槍江米

額孫熟時紫圓綠蓋大小間垂東南所未見也

歷囊香聽盡甘州垂手曲

歌舞有大曲中何曲最斷腸

銀

笙吹月山半銜尊前鐵石頑司馬肯教閒淚澆青衫經年

此處似差樂土房煤甕傾羊酪譬如生長作邊人那識金

蓋開碧閣

甘州陶工絕少官廨俱以土覆

衙散清齋一事無還能憶我前

讀書蠶空博望出下策欲將繒幣聯康居繒幣東來千萬

軸單于城畔高粱肉

單于城去鎮百里

縱使貳師出渥洼何如入

駿追周穆還想子公破月支

張掖即大月支地

當時壯節稱魁奇

而我不煩折一矢談笑欲狹前人規幾人稱王幾人帝槐

柯蟻蛭真兒戲

張重華呂光禿髮烏孤李暠段業沮渠蒙遜皆於河西僭偽號

重華空上

建業疏蒙遜解乞搜神記不知何代何王宮陰房鬼火遮

路紅彩虹已逐瓜蔓水尺碣挂壁誇奇功

龍王廟有西夏建橋碑

看

烏西飛兔東走功名富貴亦何有巧鸛當徑啄新蒲跛羊

卧路嚙殘柳監倉公子無乃愚不算升斗量錙銖作詩索
句如追逋胡爲嚙嚙古徒我不敢效我友逸粗了簿書
吟抱膝虎頭燕領百不須坐享清時懶投筆

寄倪閣公汪舟次兩翰林

細數平交真爾爾我記汪子與倪子倪子恢奇磊落人驅
毫使墨如煙雨萬卷讀破龍威篇廿年久貴長安紙晚交
汪子章江上珠光劍氣暉相向我宰山縣苦低眉君臨溪
閣時微歎三日兩日走尺書賴手清篇情骯髒契闊經年
限南北不見故人好顏色前秋我始渡江歸一讀除書展
齒折豈因王貢侈彈冠祇愛枚賈車連轍太液池頭清似
玉聖人宏網收鴻鵠耐饑且索東方米時清肯費景文燭
昌黎好在續長編未要柳州書屢促忽忽懷今轉念昔天

寒雪大酸風急晴鶴久看沙苑飛顧曲亭荒新燕入

有懷

周伯衡
兩先生

何不早貴十年前見君並轡傳呼曰短章寫就特

寄君知君執卷挑燈立

許秘字天玉號星亭侯官人舉人官安定知縣有鐵堂

詩鈔

詩話天玉論交四海爲同輩所稱漁洋雙松詩云千秋萬歲知者誰閩海奇人許夫子共許與至矣一時

如周樸園施尙白汪若文杜
茶村吳園次皆與投分訂交

水吉舟中同李竹西長芭彭陶暇守歲

中原猶未達一月在風波晚泊人煙少殘年賊騎多客心
依古堠春色到寒叢蠻地填兵甲何時縛尉佗

浙江

浮生尙飄泊又作渡江人戰守留殘壘經過屬暮春湖聲

猶向越海色更通閩不見任公子蒼茫望古津

吳門聽歌

如憐行路客莫唱竹枝詞柳暗梁生塚花深伍相祠迎春
歌扇急落月舞花遲無那彈天寶臨風起暮思

留別鷹垂次來韻

朝來放棄罷高吟老大徒羞華髮侵狗監已多妨薦語龍
門真有倦游心秋風玉筋空關塞落日金臺自古今明發
別君轉惆悵不知何處更招尋

河上寄韓固庵

十年復向帝京遊寥落金門索米秋西掖名花供判事北
陵荒草對含愁客心迢泊烏龍水官火閒吟丹鳳樓詩賦
似君真絕少才人自古重秦州

河上寄施愚山

僊郎大雅振鳴珂此日相思下濁河
乘傳才名天下少驚人詩賦粵中多
孤舟野火吟鸚鵡古戍寒刁散駱駝
不盡蕭騷蘆荻月欲乘秋色敬亭過

鍾山詩次杜于皇韻

孝陵陵上草萋萋日落江南杜宇啼
金瓦久經麋鹿竄玉環空鎖鳳凰栖
青氛大地歸科斗紫氣中天散鼓鼙
一自尊靈茲永螫才非曹植敢重題

石人十二舊戎裝繡柱參差咽夕陽
朱雀埧前無木桁烏龍洲上有沙場
暮烽偵海邊笳急秋燒彌山寶物荒
玉隊依然松柏老銅駝零落淚雙行

御宿逶迤霜露寒人閒玉盃惜凋殘
新朝常護龍虎騎高

廟空勞獬豸冠過闕謝翺揮涕淚吟詩杜甫奉心肝堆名
金粟仍無恙漫說當年勢翥盤

崩湍壞道鬱清秋七孔橋前水不流賸有黃花園石櫛絕
無青鳥戀朱邱經年置戶圍丁散垂老司香宮監愁祇見
長生荒苑鹿月明猶帶舊牌遊

訪王貽上於慈仁寺雙松下同作

騎馬橫過五都市獨數中原問王子才聞近自泰山來置
身卻在雙松裏入門拔地搖穹蒼老樹盤根渾四旁白日
蔽虧鬱蕭莽樛枝拂拂棲鳳凰世間靈物忌孤美此松殊
有相連理青銅降粒神仙家黑鐵修鱗帝王里銀欄繡砌
徒岌岌六月高寒氣弗驕科頭其下吾與爾摩崖索碣尋
前朝長嘯悠悠自千古虛壇忽聽生雷雨月石風泉迴絕

塵如入靈源不知處因之雅欲遊山東齊州九點摩秦封
爾歸岱側吾聞海明年野夫來看松

吳綺字園次號豐南一號聽翁又號紅豆詞人江都人

貢生順治甲午薦授秘書院中書舍人歷官湖州知

府有林蕙堂集

詩話園次以詩古文詞名海內者四十年駢體文尤工與陳其年並稱詩才富豔在玉谿樊川間性好客罷官後與諸名宿結春花月社凡索詩文者多以花木竹石爲潤筆資不數月成林因名種字林嘗選宋金元詩行世

採桑篇

紫陌春風路柔條壓春樹曉起自攜筐盈盈採桑去非直
爲蠶饑畏郎無好衣銀鉤正欲採驚出黃鶯飛鶯飛何決
絕踏得桑枝折甯知桑樹中更有離人別

青山下望黃將軍墓道

霜花入江江樹紅半江落日搖悲風此時客向青山路遙
見松楸竄狐兔推蓬指問黃頭郎云是將軍神道處將軍
束髮事邊疆浴血榆關四十霜射雕并挽雙飛鞬回馬常
持半段鎗曾經搏戰烏桓賊手戮長鯨囊水赤上相頻分
卧內符諸侯競屈轅門膝手縛渠魁未報恩漁陽鼓入延
秋門西京已下仙人淚南國還招帝子魂馬渡瑯琊從此
化將軍定策同王謝豈知艷曲號無愁亞子空呼李天下
天下龍髯痛未消臨春明月響瓊簫中涓厮養橫宮錦丞
相家兒插坐貂就中更有陳留子宮門夜半傳黃紙盡逐
元豐舊黨人半閒堂裏煙塵起傳檄言誅刁與劉武昌楊
柳作邊愁巖疆已付中行說壯節空思祖豫州將軍義憤

填懷抱洗日虞淵何足道一朝失計在移軍清風小用臨
江嘯倚劒空持南壁天北來烽火照甘泉橫江零落千尋
索下殿倉皇七寶鞭此時將軍鎮姑熟宮中夜到驅黃犢
紫髯怒吼陣雲昏虞歌夜泣蛾眉綠平明戰鼓動江鴉裊
創猶呼御賜騶鳴弦豈意來鶉尾拔刃空聞叱虎牙可憐
魂染胭脂血蒲首歸來事難說幾年墓木拱白楊夜夜猶
然叫鴟鴞我聞此語心傷悲爲指江涘之高壘當年廟算
列四鎮此地實爲君封陞癡兒不了公家事糶糊顛倒山
河字罵賊不及雷海青弄兵竊效田承嗣將軍抗表建牙
旌討逆應先李茂貞一喝逆流萬人死摧枯拉朽無堅營
樓煩出射弓矢墮錦裘繡帽如雷火紫電橫飛靈寶刀紅
冰膩結連環鎖至今白骨滿蒼山折戟猶存戰血斑豎子

無成悲廣武詞人多恨哭江南吁嗟將軍復何有從來運
數多陽九留守魂遊宋氏河監軍淚滴唐家酒吾徒意氣
豈能灰當時所用違其才夕陽下山黃葉兩江風颯颯魂
歸來

聞其年以博學宏詞薦爲賦短歌

陳郎五年不得意青衫頽落凌雲氣忽聞天子下徵書鄉
里小兒叫奇事兵興以後文章賤牙郎估客乘高幟盡謂
黃金可致身公卿那用張華研吾儕有字何堪煮賤賣長
門人不與妻兒大笑乃公痴何如且學揚州賈陳郎本在
泥塗中一朝走入甘泉宮掀髯脫卻犢鼻褌乃知吾道非
終窮吁嗟小兒小兒汝莫嗔當今天子重才人

蕪城歌贈送屈翁山

蕪城十月霜飛早遊子相逢惜秋草鏤管爭從月下吟瑤
觴競向花前倒忽聞屈子天際來座中眾客歡如雷共言
意氣爲君發共言懷抱爲君開聞君平生不得志讀盡奇
書有奇事萬里麻鞋訊故人千金寶劍留深意踏遍人間
古戰場掉頭不肯事侯王彈琴獨看文君鬢典酒頻銷陸
賈裝幾年漂泊人難測憔悴蘭成歸未得八月槎浮桂海
潮六朝山愛斜陽色偶然乘興來觀濤明月同尋廿四橋
只有客憐詞客賦更無人聽玉人簫竹西握手天將雪滿
路西風打黃葉送君又上白門舡秋盡垂楊不堪折杜牧
淒涼夢懶成狂歌一曲別離情西園賓客皆雲散獨聽寒
江暮雨聲

長椿寺夜坐對月同仲潛作

愛寂投僧宿君來亦不遣殘春生靜夜明月老空山幽境
能相許塵心自不閒淡然同小坐風葉打柴關

重陽後三日再集采友堂

元卿夜啟關蠟屐集花間月靜羣鴉息天高一雁還世情
逢酒淡客計向秋閒更有西山約楓林葉正斑

贈兩青上人

支公能好鶴閉戶託香林庭樹一何靜湖光相與深帆開
知雨霽磬響落檐陰我自勞勞者逢君生遠心

歸雲庵夜泛同愚山阮懷諸子

山晚離城遠寒新怯暮遊亂峯爭落日一徑入深秋清興
因官懶詩名借客留何時能解絨終夕對滄州

泊八里灘

漸遠青塘路蓬窗懶更開山煙孤塔迴湖色亂帆來吾道
存書卷餘生託酒杯寄言鷗鳥伴從此莫相猜

同雲止過石公房

寒蕉拂拂與窗齊老碧新香坐欲迷一鉢軟煙梧子飯半
鋤涼雨菊花泥閒支短杖調飢鶴學定空牀過午雞卻愧
好山從結夢明朝秋句不堪攜

送石潭歸里

雪盡垂楊已漸深臨歧折贈欲沾襟三同身世兼憂喜四
傑才華半古今嚴譴原非眞主意貧歸長繫故人心東門
一送飛旌遠莊鳥淒涼有越吟

夏日清嘯樓晚望

偶寄閒身不當歸凭欄嘗對水煙微鳥追斜日穿虹去龍

鬪驚雷挾雨飛近海潮聲秋隱隱過江山色晚依依蘆中
鼓枻無人在憔悴乾坤一釣磯

紅鷺館紀事

疎懶偏宜近墨莊披衣侵曉過林塘桐陰照檻客窗綠荷
葉滿池人語香江雨欲來魚競喜山風忽動鶴先涼不辭
永日攤書坐索有鄰家煮柘漿

再至金陵和田綸霞

頻年飄泊竟無成百不如人笑老僮學道幾經居藥市著
書從欲賦蕪城原難富貴甯須悔便作神仙未免情五嶽
縱游何不可那堪重入舊瑤京

梅清字淵公號瞿山宣城人順治甲午舉人有天延閣

刪後詩

詩話瞿山書宗顏魯公楊少師畫山水極雲煙變幻
之趣畫松有奇氣漁洋稱其山水入妙品松入神品
所作宣城廿四景大冊黃山雲海圖大幀皆刻意經
營極鄉山之勝其家多以詩名王弇州嘗贈詩云從
誇荆地人人玉不及梅家樹樹花風流可想江左韓
梅氏詩略凡舊有八人瞿山詩凡數變少年氣盛援
筆成篇後刪舊作
過半迺見遂懷

東嶽

作鎮紀崇望應星協神區乃惟羣嶽宗盤礴臨東隅峻哉
何巍巍懸磴垂雲衢半壁俯全魯遠影繚勾吳我來春夏
交瑤草方芬敷始臨一嶂斷忽出眾壑殊次第開天閭海
色萬里舒樹挂飛蜃長石蹋扶桑孤羨門如可招挾翼將
同驅乃知靈境別曠覽良不虛冥懷入神明喟焉思真符
風雨若有踈瑞應豈遂辜方期傳遙踪封禪奏成書

神宮鬱岿巖曾巖露晶瑩遙望飛蕙高驚指朝霞升陟磴

耀流目躋庭肅羣心我欲問太乙陳詞叩幽沈射牛典既
遐瘞玉迹亦湮俯仰眷春祺惟此禴翟尊範金煥寶服色
映河漢明幡幢何飄飄侍從羅羣星靈貺一以昭對越擬
紫宸厥祀匪徒然錫胤蕃斯人載協勾萌期言應郊禘辰
靈雨潤遙澤惠風澹羣氛浩矣青陽歌長此徽簫笙

石公從黃山來宛見貽佳畫答以長歌

我陟岱宗三萬丈倒矚扶桑起泱泱手摘片雲歸江東夢
中縹緲碧霞上碧霞峯正青忽然接黃海石公貽我圖恍
惚不可解絕巖陰森四壁寒雲巒窅冥驚漫漫玉屏五老
爭拱立海門九龍紛乘驂驟疑仙嶠合轉訝真宰通卧游
當嶽表乃在天都峯天都之奇奇莫紀我公收拾奚囊裏
擲將幻筆落人間遂使軒轅曾不死我寫泰山雲雲向石

濤飛公寫黃山雲雲染瞿硎衣白雲滿眼無時盡雲根冉冉歸靈境何時公向岱顛游看余已發黃山興

題畫雜詩

寒雲寒樹護山家巖壑無人一徑斜策杖行吟獨惆悵幾枝春色到梅花

秋空漠漠曉嵐清落木蕭蕭野水平愁向疎林停短棹天邊鴻雁最關情

上去江陵下石城亂帆都向夕陽明詩人好爲江干寫莫使青蓮獨擅名

朝來松響拂溪流六月寒聲似晚秋不是臨湖亭上客誰容此下一科頭

爲憐叔夜并憐松寫入生綃對影重但使撫絃能作調何

須遙問赤城峯

琴溪

高士遺臺東礪東俯臨百尺之飛虹雲卷雲舒絕壁下花
開花落空潭中丹砂鍊去山俱寂赤鯉騎歸路不通歎息
往來車馬客幾人招手問琴公

題畫答堵廉生

君鄉谷水清無敵酌水時時更憶君寄問松風雙塔靜可
能忘卻敬亭雲

午夜歌

瞿礪山上鶴長飛瞿礪山中人未歸蒼松依石坐吹笛白
雲好我霑裳衣白雲自流日將暮花枝冥冥隔溪路騰身
直上東山頭騎鶴乘風欲飛去仙人久別今當還清宵忽

渡海中山到來拍肩更相笑萬歲一朝如等閒刁斗擊精
悍歌舞楊芬芳空巖無事此良夜人間歡怨爭茫茫人間
歡怨爭茫茫午夜夜時誰短長

越中漫興

秋風一騎越山清客路東來移我情梅市逢人仙是吏烏
程作縣酒爲名

查詩繼字二南號愚溪又號樊村海鹽籍海甯人順治

甲午舉人官霍邱知縣有深甯齋詩集

黃梨洲曰樊村詩撫時觸物憂以
思勤而不怨有國風小雅之遺

詩話樊村莘霍邱有惠政會上官督催科甚迫題元
道州春陵行詩呈之有民命真當惜守官良獨難不
因兩稅緩那得一州安之句見杭州詩輯此舊鈔深
甯齋集詩闕七律以下文祇序三十七篇蓋後人擬
拾殘帙其馬草行破夫行亦
新樂府諷諭之體故采存之

馬草行

鐵甲三千動地來馬蹄雜沓如轟雷軍有供頓馬有穀縣
官奔走如奴僕芻茭比屋困誅求府胥索錢不即收君不
見江山城頭新鬼哭招魂無人鳥啄肉

礮夫行

十月王師捕山賊縣官追呼礮夫急一六當頭領僱夫百
夫押以衙兵十此行只向烏傷去不比驪山送徒戍况復
王官如父兄蓑笠餼糧爲爾具惡少奸胥暗結連一夫索
錢八十千訛言街巷聲喧闐幕府飛箭龍旗鮮陰雨泥瀟
滿天黑村鄰有夫招不得素封華屋尙張皇小戶單丁軀
命逼縣官見此中心哀走謁太守申藩台輸金僱役從民
願稅戶歡呼打槳回記得前年十月半倉前糧艘帆影亂

只今米爛未輸租又值役夫連海岸父母咨嗟望太平少年喜見煙塵生衣租食稅尋常事拜將封侯無爾名

後礮夫行

歲莫喧喧夜捉人當門縣尉點行頻押送江干下江船王牌忽下哀覺民蒙恩謹噪聲動地得錢脫役誇親鄰誰知羽書傳日暮王師倉猝西興渡桃符竹爆空酸辛菜餌釘盤將不去雨雪江山煙火稀白骨支撐滿前路行到金華呈太守幕府無文停待久白晝呼羣掠遠村醉圍解尉攢拳毆解尉獐徨無羽翰科錢營脫離險艱黠徒乘機從此逝追至蘭谿半不還縣差承帖追逋目鞭笞狼籍空勞鹿歸時老幼盡歡欣重去難將消息聞男兒輕死貴死敵何不弓劍學從軍

後馬草行

四百八十墩夫行馬草十萬連催征縣官憐民省民解牌
差斂費紛縱橫前年解錢塘今年解信安信安山多稻草
少戶口流亡斷飛鳥營盤草多要折錢解吏索錢還索草
去年溼草爛江干草戶於今杖血丹安得馬嘶息海岸樵
歌出村聞夜半

曾晄原名傳鑑字庭聞甯夏籍甯都人順治甲午舉人

有金石堂集

詩話庭聞明太常卿應遜子隨父軍中後奔走闕越
關隴遂入籍隴西鄉舉後始歸省母與弟燦並工詩
有蒼涼之音在甯都
諸子中亦矯矯者

梅下望家信

又覺春風到梅花信不來隴頭赫連國庾嶺鬱孤臺地以

青天接蒼難白首開壺收邊徼淚長嘯大江迴

和黃岡杜于皇澂江贈詩

此生猶見汝幸汝不伴狂身世看秋籜乾坤正夕陽臺城
窮徹骨夏浦飽經霜謾說工詩賦青燈鬢髮蒼

丙申自秦中歸送弟燦就耕烏石隴

每羨西周古千家尙力耕高原無奧草春日少人行襍
空山滿衣冠亂世輕鹿門歸去好閉戶有松聲

晴川閣

大別排雲住楚山一望開亂流爭歲月孤嶼下樓臺高浪
沱潛出夕陽嶠冢來湖南征戰苦幾處角聲哀

贈顧松交吏部

直覺東歸似故鄉每逢佳節就君觴客中文譙如羊曼吳

下名園數辟疆芳草書疑歌扇綠落花春散舞衣香東山
未許頻游玩早晚徵書發建章

鳴沙洲

不見黃河春氣動卻從沙磧辨陰晴流澌著水天皆凍大
漠無風山自鳴飲馬浪尋荒燒窟射雕貪出苦泉營傳聞
烽火年來息張軌隗囂已盡平

題萬年少年伯照西草堂

歌風臺下夜烏啼鬱鬱山莊古木齊半畝桑田人去住一
湖春水屋東西星臨豐沛瞻龍虎地接青徐雜鼓鼙獨把
漁竿憑月釣門前草色正萋萋

王澤宏字涓來黃州人順治乙未進士官至禮部尙書
有吳廬集

易州新使院詠松

去年手植新松樹，碧葉青枝取次陰。
榦長凌雲應有日後人，誰識歲寒心。

買花

賣花擔上露纔乾，野老移來滿藥闌。
拋卻故山花事盛，翻來燕市買花看。

羅爲廣字西溪南充人，順治甲午舉人，官行人司行人，
過合州。

放舟天未曉，夢醒日初晴。
雲繪遠山色，江流急雨聲。
岸沙留虎迹，炊靄見荒城。
在昔繁華地，荒涼感客情。

林堯華字聞伯，莆田人，順治甲午舉人，官榆次知縣，有

浣亭詩略

去榆次縣作

做廬風雨足苔磯句漏尋砂覺昨非
菱米有租充石鼎荃絲爲布翦山衣
詩情獨往蠶抽繭酒興頻年鶴退飛
聞道閩南開市舶過江通印子魚肥

李瑁字宕山渠縣人順治甲午舉人
官鳳陽知縣有片石齋集

聞笛

晚霽江城夜氣清
寂寥孤月對愁明
誰攜羌塞三更笛
吹作吳山十月聲
豈有梅花開更落
自驚楊柳折還生
天邊舊業歸何日
爲爾今宵夢不成

榕城雜詠

民力東南久驛騷
尙聞飛艦欲凌濤
將軍自許標銅柱
長

吏誰曾過石壕藜草夜呼朝市閉海田春隔線垣高何當
借箸籌方略願罷乘風破浪艘

別孫無燁

巖社棠陰晚未殘相逢誰復問南冠令君座上香三接公
子門前鉢幾彈久客未聞生馬角累人何止愧猪肝擬將
千尺珠湖水深比桃花一樣看

陶憐字冰修嘉善人順治甲午舉人官天台教諭

集徐文在山園

草堂倚絕巘山色映朝暉晴日凝花氣香風到客衣霜崖
丹樹迴竹徑碧雲飛況是登高節長吟坐翠微

同諸子游石梁時張九夏不至

丹崖萬仞倚天高臨水登山託彩毫金嶺秋風馳列騎石

梁落日挂寒濤劉根自是乘霞客子晉甯嫌控鶴勞竊怪
季鷹招不至愍然亭下續離騷

孫中彖字易公號蓮溪桐城人順治甲午舉人有樓月
堂詩集

秋日送戴山民游豫章

北山高枕卧煙蘿送爾長征感慨多猿狖夜啼孤嶺月魚
龍秋靜五湖波尊前怨別攜吳劍客裏驚心聽楚歌若上
滕王高閣望西山南浦近如何

陳忱字用亶秀水人順治甲午副貢有誠齋詩集

茗城雪中歸棹

孤城門未啟風雪一舟停村店茅柴酒官塘牧馬亭逼寒
頭轉白仄岸草猶青歲晏歸心迫鄉音易動聽

蔣玉立字亭彥嘉善人順治甲午副貢有泰茹堂集

渡江

江流九派盡朝宗六代繁華悵舊蹤千里雲浮瓜步樹片帆風送蒜山鐘鶯花半落愁邊過烽火頻年客裏逢五岳尙賒他日願何時汗漫一相從

寄魏交讓

青郊結伴共相招白社風流尙未遙日暝鶯聲聞柳陌春深花落轉蘭橈騷人自紀庚寅歲旅客重過丁卯橋我念離羣空對月懷君江上影蕭蕭

陳數永字雒期號學山海甯人順治乙未進士官至工部尙書諡文和

依韻酬念祖弟歸應省試

河橋折柳悵難留且試驅車歷九州芳草平沙逢驛騎斜陽深樹見山樓洛中已識三都賦江上休披六月裘桂子秋風應早發好攜彩筆渡金溝

田種玉字公琢宛平人順治乙未進士改庶吉士授編修官至禮部侍郎加工部尙書太子少傅

詩話公琢以順治甲午舉順天鄉試第一明年卽登第迴翔臺閣剛介不諧俗左授奉天府丞乞歸卜居易水蒔圃自給康熙癸巳年逾八十景陵詢順治中科目舊臣存問進秩又數年乃卒

海淀

清秋人意豁引興到郊西金谷昔輝映濠梁今品題插天石劍矗拂地柳絲齊靜悟疑身隱荷香滿袖攜

徐旭齡字元文號敬庵錢塘人順治乙未進士官至漕運總督諡清獻

詩話清獻事親孝父死於寇行求瘞所以夢兆得之
歷官清介有聲在都居槐市斜街出都後趙吉士給
諫繼居之號曰寄園爲
一時城南觴詠之地

送吳次公遊蓬萊兼呈沈留侯

爲厭風塵作客難且依仙吏策輕鞍燕臺碧樹雲初轉秦
望神芝露未乾豈有侯門憐駿骨好從海客問金丹酒徒
去住恩無定離思中宵月裏看

圖爾宸字自中滿洲旗人順治乙未滿洲榜一甲一名
進士授修撰官至工部侍郎

晚鐘

梵放忽然寂前山聞暝鐘聲催斜景入路隔翠微重老樹
警眠鶴空波迎古龍予心澹無慮真欲契禪宗

晚步

野色初開宿霧清晚晴天氣嫩涼生半陂新水鷺鷥立一
架落紅鴉鳩鳴霽後煙痕連樹碧雨餘虹影接霞明蔣生
三徑無人到惻悵行吟句未成

史大成字及超號立盒鄞縣人順治乙未一甲一名進
士授修撰官至禮部左侍郎兼翰林學士有八行堂
集

送張越青給諫終養歸里

是處歸春雁鳥飛猶上林多君愛日疏先我望雲心臣齒
幸還少主恩良自深望塵追可及策馬莫駸駸

范潞公去官歸里

山色故園好妒君歸及春詩從攜杖得名以去官眞林筍
甘於蜜湖蕁綠似蘋試看紙尾署誰不歎風塵

楊雍建字自西號以齋海甯人順治乙未進士授知縣
官至兵部左侍郎有弗過軒詩鈔

觀風臺

城上高臺接混茫天都風物鬱蒼蒼雲封雉堞千村繞地
並烏聊六水長見說春溪仍樂土安知歛浦一殘疆黃峯
極目徒相望贏得愁思滿客囊

李贊元初名立字望石大嵩衛人順治乙未進士改庶
吉士授御史官至兵部侍郎有滴翠園集

詩話望石自庶常除侍御出按湖北手繫巨猾力擊
冤誣以是有能名復巡淮漣清割沒疏濬引革委掣
嚴私販禁旁費復釐丁先後奏行擢督捕侍郎
時逃人法嚴疏請度改最苛者數事時尤稱之

春日登宏濟寺

縱覽曠無際長江一望深危亭穿石罅密樹散春陰帆影

當窗暝鐘聲入浦沉盤桓千仞上徙倚自長吟

錫山晚泊

片艇尋幽勝溪行幾曲灣夕陽微照水雪影盡歸山汀鷺
河邊去漁舟浦外還旗亭何處問樹下綠陰閒

孫光祀字作庭號朔玉平陰人順治乙未進士改庶吉
士由給事中官至兵部侍郎有膽餘軒集

吳耕方招飲觀菊

秋光澄几牖入夜有餘清叢菊絢屋壁環向各爲情華鐙
更交輝羣蕊滋晶瑩徵歌引羽商簫管間瑤笙曲緩落輕
塵縹縹度新聲氣靜欲息機那復世味櫻嗟彼利祿客役
役多所營何如付澹忘杯酒慰平生微醺醒歸路天半斗
參橫

與郝雪海徐孟樞同事武闈賦贈

縱談晨夕慰如何柱史憂時感慨多誰靖烽煙蟠地軸擬
攀星漢洗天河空聞甲冑盈邊壘可有熊羆入網羅但願
四方銷戰伐無勞聖主大風歌

劉芳躅字增美號鍾山宛平人順治乙未進士改庶吉

士授編修官至工部侍郎

詩話鍾山爲五瑞尚書餘祐子康熙中撫山東兵後
彫敝免秋稅蠲丁徭通行賑卹刪除舊藩產稅外加
租甚有惠於民竹垞嘗客其
幕爲作澁泉記稱其清德

曲阜晚眺和朱竹垞韻

孔庭釋菜後攜客步莓苔犧象湯孫徹金絲魯殿開牲碑
工拓就蒼草馬馱回愧少春秋癖言旋罷講臺

綦汝楫字松友高密人順治乙未進士改庶吉士授編

修厯官內宏文院學士有四友堂詩

送單牧之赴任灌陽

建陵迢遞半年程
灌水爭如密水清
月靜千家聞虎嘯
峯迴萬樹聽猿聲
依人翡翠巢官閣
夾道桄榔接驛城
報最何勞三載久
於今南國已休兵

移居鄰王茂衍方伯

薄宦居難定
移來思不窮
高樓晴有月
老樹夜多風
閱世游將倦
懷鄉夢欲通
南鄰詞賦客
恬澹此心同

張惟赤字侗孩號螺浮海鹽人順治乙未進士厯官工

科給事中有退思軒詩集

詩話螺浮在諫垣屢上封事嘗議停園占革厥夫言人所不敢言時爭誦其議直有園在棗林街龔芝麓尙書有過螺浮飲及觀侍史龍梭演劇諸詩

東郡七夕立秋

光岳樓前暑氣收，斷雲疏雨送扁舟。
關河暝色催碁近海，岱煙嵐入樹浮。
天上雙星方渡漢，人間兩鬢又驚秋。
明朝玉笛聲淒切，風起黃榆白雁愁。

梁熙字曰緝，號哲次，鄆陵人。順治乙未進士，由知縣歷

官御史有哲次齋藁

詩話曰：緝初令咸甯，廉能有聲，既入西臺，出巡茶馬，
不取一介，與若文阮亭諸公游，皆雅重之。文點與也，
爲作江村讀書圖，若文題云：鄆陵野色，平於掌也。有
江南此景，無阮亭云：江花江鳥，不相識，寫向丹青俱
眼明。若文愛江鳥，江花之句，復題云：江南於汝，關何
事賦得愁心，爾許深語，涉輕俊，至留別日，緝云：澆酒
先生粗闕徑，逃禪居士好攜家，則肖其爲人矣。若文
與葉子吉各爲哲次齋記，謂侍御願居會哲之次，意
以狷者自命，又作哲次齋圖，寄之繪一梧一石一鶴
賦云：先生齋中，非必有此數物，聊寓清標，逸况耳。存
詩二卷，蓋非專長，集爲子壻所編，家書吏牘，概錄靡
遺。卽友朋贈言，亦盈巨帙，雖嫌汎濫，亦藉以考見平

也生

書砦居屋壁

陰氣昏白日凍雀噪暮枝徘徊如有待紆徐掩戶遲念昨
愁不寐懸席透夜颼隙月點霜被病骨冷難支斷牆集野
礫遂若愜幽私燒燈拾僵蠹竹素欣相披側身還悵望儒
術欲何爲土壁搖寒影蕭條十年思

去秦

青陽催淑景林麓一朝新鳥鳴東郊路飄然今去秦惟昔
抗遐想豈期傍風塵蒲鞭違夙願中夜自酸辛將投衡泌
老翻作京國人潦倒時何濟展轉志欲伸父老壺漿惠道
周擁勸頻今年雨澤足君不待芳春對此心惻惻幽懷未
易陳知爾難忘舊淚眼寄渭濱

壬午出汴城五年不復經過丁亥計偕循內堤望壞垣有悲往事

斯城仍聚水過客欲招魂慘目今如見微生昔竟存民終

煎市釜冠自盪宮門冠乘筏入周府復燒西城門樓河伯浮餘息臨流永

戴恩

咸陽

青門昔傍渭濱行豈意秋風到渭城不盡寒波斜日動可憐荒野暮雲平雄圖過眼迷三輔別酒當歌疊四聲槐里宵深殘燭下還將雜記閱西京

早寒

秋風吹雨嘗如此不合蕭蕭入客耳碧草搖風溼欲翻元蟬抱葉冷然止祇林一卧歲時闌可奈無衣悲早寒悲歌

乍放聲還歇今日誰聽行路難

雨中遣懷和劉伯啟韻

無鉞彈時少爲園閉日長匡牀秋得適布被雨知涼樹許
江潭賦花因栗里香平生蕭瑟意身世好誰商

潼關

川原繚繞望中收西映殘陽舊戍樓形勢長連三輔壯風
雲自湧大河流泥封函谷無諸國瓜種東陵有故侯還憶
繁臺淪陷日曾開玉帳控中州

張注慶字元長號曲山閩中人順治乙未進士官御史

巡按廣東

濯足仙女潭同費此度作

濯足仙女潭潭水清且潔輕儻出其間鱗次悉成列長挹

清流香芳餌非所悅猿嘯萬山雲漁歌兩岸雪我友醉濁
醪爲探馮夷穴數詠吳隱詩不見心如結

周宸藻字端臣號質庵嘉善人順治乙未進士改庶吉
士授御史有柿葉齋自東客游等集

張穉恭中翰招同高念侶副憲王蘭陔水部湖舫宴
集

晴湖如練水雲收畫舫相攜興自幽幾處柳陰浮綠蟻誰
家花影傍朱樓回思聚散憐佳會過眼風華感昔游搔首
斜陽頻悵望乾坤何地是滄洲

秋懷

憶昔曾看禁苑花恩深甯敢效懷沙病收陶令三秋菊貧
賣青門五色瓜邱壑道存惟我輩江湖歸老已無家不堪

往事空搔首獨立蒼茫起暮霞

傅辰字蘭生一字彤臣號麗農山東新城人順治乙未

進士由推官歷官御史有瀛海燕居柏臺于役南游

家居美芹諸集

詩話彤臣初授河間推官以明允薦行取入臺出按江西值九江兵變命疾驅渡江具儀衛入城喻以大義召九江守給餉如額事遂定漁洋爲誌墓稱其忠信樸直能從容定變

廣川道中和貽上韻

道旁故壘跨連營積雪侵雲勢欲平莫笑角巾無武畧禁中頗牧是書生

丁澎字飛濤號藥園仁和人順治乙未進士歷官禮部

郎中有扶荔堂詩集

詩話藥園早歲工詩列西泠十子中有白燕樓詩吳下士子爭書衫袖葵州吳賜如之器有句云恨無十

五雙鬢女教唱君家白燕樓爲一時傾倒如此通籍
後與宋荔裳施愚山游復列燕臺七子集中五古託
體類謝七古步武高岑其矯變豪邁間逼太白律詩
精鍊沈雄雅近初唐爲同時梅村芝麓阮亭諸公所
重及謫戍卜築南岡躬自餽牛詩益奇壯性不善騎
樵夫牧豎皆知爲藥園先生也藥園初官刑部冊立
東宮無諳典禮者調入東省兼主客貢使至譯館廉
知丁爲主客持紫貂玉屏從吏人易其詩歸國

酬吳司成梅村

風雅久淹沒延陵抱幽悵博涉慕馬卿遐覽追謝傅羲輪
躍咸池羣星燦奔赴琨瑤厲秋霜淋響諧寶璐青雲曠千
載鸞鳳相追步驚飈動紫闥搖落思元賦玉池明光草金
莖茂陵樹宮商紛迭陳斯音獨韶護

尋聚遠樓故迹感舊

層樓嶮峻雲溶溶下瞰縹緲之孤峯巉巖環拱若列戟敢

泉倒出雙飛龍湖山無恙城郭改老樹突存千丈松憶昔
高宗常駐蹕南渡朝廷全盛日君王吟坐愛此樓月榭梅
坡最清逸和甯門外提點呼御舟傳喚戲西湖教坊雜進
太平曲六么夔賺紛笙竽王儁角觥林賽舞纏頭亂擲紅
瓊瓦子勾欄銀鑿落簫聲忽起熙春樓點花牌動青絲絡
爭看吳憐唱柘枝山鳥不啼風雨索四百年來往事非銅
駝草深螢火飛朝朝松柏西冷路何處梨花無燕歸雲鬢
翠飾交龍鈿熹廟繁華眼猶見居人尙指玉津園畫船簫
鼓喧波面紅裙低拜鄂王祠銀箏細撚平章院一旦黃塵
動地來綺羅香散成蒿萊獅子巷中土花落酒市墟荒絡
緯哀樵采時聞歌勅勒紛堞悲笳吹落梅不見南朝舊烏

鵲至今長繞越王臺

送劉石生之秦

萬里咸陽道三年復此行
雁聲寒渭水秋色上蒲城
日蝕秦碑斷天空漢時
平尙留雙劍在風雨試長鳴

野眺

秋原落日俯長谿倚暮看山
獨杖藜滿目蒲菰雙島外幾
家煙火萬峯西泉傾古洞雲
偏出人在青冥鳥亂啼精舍
不殊尋柳谷惟令許掾得幽棲

左萊陽著書宅

生平苦憶左萊州
謫去龍沙萬里流
按曲能傳中散調
遺書應恥茂陵求
黃榆夜雪長驅犢
紫塞春風幾換裘
潦倒暮年誇健筆
至今辭賦滿滄洲

報宋荔裳觀察

風起盧龍急雁行幾年歸夢渡漁陽髡斜季布藏車下鈞
黨符融泣路旁馬怯危橋冰汨汨鶴鳴橫嶺月蒼蒼乾葵
棘兔驚秋晚不敢逢人問故鄉

登岱

翠微宮殿俯危巒嶺坂逶迤更幾盤天近扶桑長不夜月
明瑤草易生寒松鳴越觀留山鬼鳥啄秦碑淨石壇七十
二君封禪地回中風雨想和鑾

孤懸海嶽枕神洲得供盧敖拄杖游天外數峯開漢時星
邊九點辨齊州清宵鶴搏浮雲落古洞龍吟斷壑流人在
碧城看夜色芙蓉何處接層樓

飄渺神宮霄漢間丹梯突兀迥難攀蒼龍峪窈窕歸洞白

鶴祠孤雪滿山呼吸自能通帝座風煙原不到人寰未逢
刻石千年事梁父吟成獨往還

千丈懸崖撼石閭捫蘿疊磴倒衣裾孤峯半落天疑盡絕
頂平臨日乍舒帝女珠宮喧象珮仙官絳節駐鸞車白雲
尙見封中起笙鶴如聞度碧虛

劉體仁字公誠潁川衛人順治乙未進士歷官吏部郎

中有七頌堂集

詩話公賦才氣橫溢詩文特其餘事既登第官郎署
與王阮亭汪堯峯狎主壇坫存詩入卷雖不盡可傳
而卽事抒懷中有真氣四庫提要謂其出入於竟
陵公安之間未盡除明末山人之習非篤論也

松村訪傅青主先生

城外好風日騎驢投谷口雙塔出深松厯村翻在後旣涉
石子溪乃望巖間牖柴門過樵牧試問在家否野色照鬚

眉下堵笑執手生平良內愧出言猶色忸淚睫述家門呼
兒具杯酒汎愛答夙心所言皆師友移情縱談諧遂忘風
塵久日暮徒依依中心亦何有

送戴務旃游華山

夜談太華奇朝起理輕策似子獨往意自然生羽翮我無
濟勝具心懸神仙宅椽壁間蟻緣索度或猿擲卽至玉女
盆蓮花豈堪摘頗窮造化由能識巨靈擘一身出天地笑
看培塿積歸來毛髓異定跨茅龍脊

贈歸元公

歸生聲名滿天地詞倒峽流腹經笥看山不計沽酒錢對
客轉喉多觸忌口雖生花家屢空黃金不肯謁王公蕭騷
星鬢對尊酒烏絲揮灑蠟炬紅歲暮一舟浮震澤第二泉

邊我躡屐相逢大笑把君衣
楓楸丹黃霜燠自令君好客
如臨邛狂談高詠爭爲工
深杯如瀉三山海泛君古上青
芙蓉文采風流有先後
君家太僕如北斗一時潦倒何足
云星日光芒自不朽
君今潦倒知者誰
眞成厯落復嶽嶠
寒波振柁情無極
清潁藏名理釣絲

劉元徵字伯誠號夢闡
大名人順治乙未進士
厯官刑部郎中有培園詩集

登京口玉山清音閣

策杖躡江巘臨風倚梵樓
秋天出遠樹夕照見歸舟
清磬雲中發驚濤檻底流
坐來塵境隔疑是御風游

太平劉松舟別駕席上口占

江雲惜別年華易
筇市論交意氣雄
萬里行蹤驚去住
百

年身世感窮通月明城郭潮聲滿雨霽池臺暑氣空好客
中郎還倒屣倦游司馬自飄蓬

李繼白字夢沙臨漳人順治乙未進士由知縣歷官戶
部員外郎有望古齋集

虎邱寺

年年清夢虎邱游雨散花飛點石頭曲徑迷離山向背雲
房深闕樹春秋梅舒冷豔香生閣茶試新泉雪滿甌好向
五賢祠上望使君才不愧蘇州

邱象升字曙戒江蘇山陽人順治乙未進士改庶吉士
授編修歷官大理寺左寺副有擊音入燕嶺海白雲

草堂諸集

江上雜興

白門霜落柳條枯
誰買銀鱗過酒壚
萬里行人千里雁
夕陽相對下菰蘆

清遠峽

委折江如綫
鋒稜勢益增
曉昏雲氣變
雷雨石痕崩
洞古空猿跡
庵荒暗佛鐙
客心愁入暮
高峽尙層層

苦竹渡

夕陽殘影沒
衰眼翳長空
樹暗驚人語
溪寒避虎風
戒心齊擊柝
野火亂燒叢
前路津門是
星華望未通

楊繼經字傳人
蘄水人順治乙未進士
官大理寺評事
有菊廬詩集

憶玉臺山春曉亭

玉臺芝老狼煙盡
三十年前山盡禿
玉臺花發春雨深
又

向巖邊結茅屋屋前寂歷春曉亭春花爛漫春山青清泉
欲斷不復斷春鳥未聽時可聽三年此別意長往石門苔
磴隔塵壤昨夜鐙前夢落花依稀似到山亭上

宿智印禪師道場

翠壁蒼崖接汶寥參差黛嶽倚雲霄夜寒元豹嘯林密春
暎驪龍聽法遙金鐸寶幢傳佛偈石梯殘字見南朝偶來
欲脫荷衣去慚愧無因挂一瓢

憶蘄上舊居

五柳思歸不得歸桃花開後鰕魚肥幾時爲掉輕舟去自
到湖邊放鶴飛

曹申吉字錫餘別號澹餘安邱人順治乙未進士官至
貴州巡撫有澹餘詩選

宛邱春日行

欲雨不雨春色深青青嫩草俯牆陰幾樹繁花開欲盡一
叢弱竹不成林竹影花光時映水鳥飛未動聲先起憶向
江邊怨去年卻來湖上思千里湖上韶華正可憐繞城春
水盡漁船鷗鷺自隨雲上下樓臺直共水淪漣隄上誰家
新種柳裊裊游絲紛左右燕至欣逢上已前鶯啼已過清
明後上已清明煙色濃太皞陵畔數株松宛邱自有西湖
樂夢裏青峯三四重

聽歌者周生

參軍絕技出天然曾侍開元供奉筵幾部龜茲零落盡至
今人識李龜年

湘陰

蕭瑟黃陵廟依依帝子靈渚邊蘋自白湖外草猶青雲薄
紛遙岫煙寒隔淺汀當年虛九辨高詠有誰聽

梁儒字宗洙漢軍旗人順治乙未進士歷官江南提學
道僉事有微音集

游西山

磴道盤空上禪關半夕霏樵聲散幽谷山翠溼行衣帶露
危花墜穿林獨鳥飛逍遙塵壒外得意便忘歸

春初雨中獨坐

煙雨濛濛隔薜蘿雨中極目試如何好山入望青猶淺芳
草緣隄綠未多濁酒筇來聊自適新詩吟就獨高歌人生
行樂須臾事莫放春光取次過

馮雲驥字訥生代州人順治乙未進士康熙己未舉博

學鴻詞歷官福建督糧道有飛霞樓詩雲中集國雍

草花園偶輯瞻花藁涉霞吟青苔篇

詩話誦生少承家學聲譽藉甚蔚州魏敏果目爲畏友已未以誦生與湯文正畢布政振姬並薦鴻博當世榮之性和易與人接從無疾言遽色而居官侃侃守正不阿所至有聲爲後進所師事蜀人祀之文翁祠閩人祀之朱子祠皆曠舉也

時序篇

童童山上松條條風中柳四時一以化貞脆隨所守人生
天地間苦無金石壽陰陽不停馭霜露變林藪小人羨榮
利志士恥升斗余生三十年碌碌猶奔走探海斬妖蛟利
劍不在手側身視風塵哀歌對樽酒明月寫素心孤雲結
良友會許稷契儔羞居管晏後進未奮功名退非耕畝畝
一身半浮沉百年任休咎今古浩無涯悠悠歎白首

述懷

人生各有命富貴安可求
靜心服道素泉石恣優游
冥鴻達者羨文犧志士羞傷彼陌上花
疾風吹未休去爲溝中泥妍華詎可留
南山有古木曾不畏高秋

猗猗蘭蕙香露濯鮮華
好采爲君子佩過時恐枯槁
蘭蕙何易衰茂茂菴蒹草
丈夫懷遠猷乘時苦不早
意氣矜豪雄日月贈人老
身世歎悠悠忠信以爲寶

雲中行贈王廣生

邊風動地吹沙白雲中
三月春草碧舊內荒涼長野蒿
飢鳥哀鳴啄亂石我來弔古倍
淒然蕭條野燒望平田崖崩
黃土麒麟塚苔沒紅樓玳瑁筵
紛紛駝馬城南去躑躅一聲
天欲暮甲光慘淡寒霜明
大旗縹緲愁雲護況復輻軻

歎鄭虔空齋寂寞冷朝煙傳經莫謾誇劉向載酒何人過
草元王子峩峩天下士攜來一束牛腰紙白雪裁詩富新
詞朱霞摛藻發奇理開樽共醉碧桃花渾忘踪跡在天涯
吹來柳絮依人袂飛過黃鸝照影斜當年趙女能歌舞可
憐羅綺爲塵土玉貌香消白蝶春花魂夜濕青燐雨白登
臺邊古戰場荒墩老木迴蒼蒼雕戈埋月沉空壘石馬嘶
風倚壞牆龍堆遙望愁何極平郊月道迢迢直與子高歌
一愴神南山萬古傷心宅

潼關行

潼關城下月如水潼關城上鼓聲死司馬北望拜神京臣
報國恩畢於此萬羣寇馬踏沙黃長戈大戟飛寒鉞彎弧
舊將嬰城關斷甲材官泣戰場孫公灑血潼關道鬼馬不

歸嘶碧草花袍玉劍委紅泥
渭水飛鴉波浩浩冰巾帽
何嶙峋就義從容不顧身
雛鳳玉顏同日死千年石砌閉
青春幾隊蛾眉愁耿耿飛鳥輕身墜
碧井綠鬢吹爲夜雨
苔紅衫化作流霞影
有子蒼茫西向秦
荒園遺跡訪蒿榛
昔日夾道紅旗陣
今日空衙動野燐
愁雲覆井寒煙古
秋風蕭蕭黃葉雨
玉骨曾傳葬此中
鬼神長護埋香土
牽來素綆古龍驚
莊容衣佩宛如生
觀者萬人共歎息
方知天地鑒幽貞
重向戰圍淚沾臆
青山一帶愁何極
元戎戰骨碎
刀痕魂魄茫茫招不得
更有遺孤已二年
父老指點私相憐
破巢漫說無完卵
趙氏嬰兒自瓦全
同時飲劍有喬公
呼天拊膺氣何雄
腰橫寶帶眠頽喋
手擲頭顱向晚風
眼見山飛滄海立
銅駝霜冷荆榛濕
甯武孤城再合圍
餘

者降旗拜寇入吁嗟乎悲哉國家之亂誰爲基英雄數盡
際艱危翼虎已分鷄首策趙卒長平大聚時一門仗節古
來少日月飛光同皎皎青楓夢斷麒麟圖香閨血化鴛鴦
鳥有臣死國婦死夫高風大義厲頑愚嗚呼其形往矣神
未徂嗚呼其形往矣神未徂

撥悶

喬公遷高字元柱定襄人以明經官監軍道罵賊伏劍死

大漠草竿竿羈愁望遠天風斜高鳥影雲淡落花煙遲暮
憐吾道干戈閱歲年南山歸去好涼雨種瓜田

懷唐于野

唐生甘石隱高卧大江秋片月依蓮社孤雲隱竹樓煙花
六代渺詩卷萬年愁徙倚層樓晚雲橫白鷺洲

贈李天生

與子幾年別重來欲白頭徘徊今日飲慷慨古人愁雁度
千山月雲橫大壑秋向禽曾有約汗漫幾時游

戴王綸字彬極一字經碧號一齋滄州人順治乙未一
甲二名進士授編修歷官江西糧儲道罷職康熙己
未舉博學鴻詞

章門新秋送客北上因寄龔芝麓年伯

楚天秋色動征橈北望燕山道里遙此去酒壚誰擊筑一
時江月正吹簫雲生驛路銅龍曉沙滿關城鐵騎驕勞苦
中丞高諫議可無書訊下雲霄

陸求可字咸一山陽人順治乙未進士官福建參議

大田驛曉行

衝煙行古道長劍伴孤征殘月曉猶白吟蟲秋愈清氣蒸

知海日潮起聽江聲欲向芳洲上褰衣擷杜蘅

福永道中

滿目憐凋瘵荒原不忍看炊煙一路少廬舍幾村殘澤畔
烽初息居人夢未安蕭蕭風雨後空見海濤寒

胡在恪號念蒿江陵人順治乙未進士歷官江西鹽道
有真懶園集

張翁止宿

檐雲靉靄倚江邊籬菊蕭蕭疏暮柳前漢上抱來空有甕成
都卜後並無錢榻懸客夢生殘月酒醒鄉關隔曉天莫道
一廬猶小隱青羊相憶計何年

張聯箕字德生號卽公益都人順治乙未進士由知縣
歷官澂江知府有穆如軒詩略

卽景

結邑依山麓荒城物候偏
三時常過虎七月未聞蟬
舉案黃蘗飯投牀白褐氊
炎涼忘世味我欲慕巢仙

權知吉州九日感賦

空庭惟落葉閉戶見秋山
雉堞連雲暗溪流抱郭灣
白衣人寂寞黃菊色凋爛
徒有宰門役登登版築間

紀元字季愷號子湘文
安人順治乙未進士由推官
厯官鞏昌知府有卧游山房
臺

夜至西湖對月獨坐

新秋纔見月湖水散清輝
林外花初落池邊鳥自飛
兩峯迴竹嶼一艇到山扉
庭際當搖落懷人應未歸

楊應標字勝林號南城嘉善
人順治乙未進士由推官

歷官劍州知州有永思堂集

靜夜吟

夜久羣動息秋潭冷素心推求往古事歷歷羅胸襟守貞
道所貴回遙眾乃任滔滔江湖流一往不復禁窮巷罕過
轍寂寥鳴素琴長松挺孤秀何憂霜雪侵

東明河上口占

重重隄岸繞東明盡是黃金力築成不用防河桑柘滿老
農帶月荷鋤耕

朱孔照字浴曙號雲台應山人順治乙未進士官蘇州
同知

游天井澗寺

攬轡蒼茫裏東風曉日斜香吹新草木綠徧舊桑麻山碓

春流水茶鐺煮落花不知城市近猶有此煙霞

張錫懌字越九號宏軒上海人順治乙未進士官泰安

知州有樹滋堂近橐

詩話越九寄情山水舉結轡之氣一寓於詩官泰安州州有捨身崖愚民往往投其中越九甫親事卽禁止廣學舍減香稅復四氏學州人稱之被議歸居黟雲閣著書以終

喜吳漢槎南還次徐健庵韻

思君頻望玉門關少壯漂零萬死間同去幾人多白骨生
歸一輩半蒼顏江鄉楓冷家何在塞磧雲迷雁獨還聽說
流人最腸斷黑河無渡水潺湲

錢黯字長孺號書樵嘉善人順治乙未進士官池州推

官有潔園存橐

詩話書樵爲塞庵相國孫官池陽年甫及壯告歸杜門著述年九十五乃終登第逾七十年一時稱罕見

也

過涇縣水西寺

馬蹄得得趁平沙，高下林巒入望賒。
淺瀨過帆迴雉堞，淡煙籠竹隱人家。
亭涵疏雨松濤細，寺俯驚雷夕照斜。
客路風光在何許，紙窗月影到霜花。

于鵬翰字六息號山白文登人順治乙未進士官峽江知縣

臨川雨夜

寒雨瀟瀟夜偏來，客邸多蕉聲殘漏滴竹戶野雲過潦倒
荒陶徑風塵慚邵窩倚牀將假寐何處賦離歌

蔣中和字本達一字位公晚號眉三子靖江人順治乙未進士官蘭陽知縣降滄州州判有半農集

詩話位公詩境冷峭無恬野無俗拙於爲吏
窮老著書集中文多於詩好尙論古人蓋崎士也靖
江僻邑傳人甚
稀斯其俊俊者

詠懷

萬里繞長空秋雲浮海曲海曲有伊人長嘯無係屬歛霞
以爲衣嗽波以爲粟落日沒千山荏苒又初旭神龍亦可
烹所患在多欲

繩牀繫尺瓠霜月掛庭樹皎皎清夜心幽人起獨步昂首
盼空濛雲自疏林渡無端發清響蟋蟀吟秋暮自問有何
知遣笑杜武庫

洞庭多奇波終南饒積翠常與世相親亦與世相棄孤鶴
有餘情閒伴白雲契渴飲湖中水飢啄山中糈舒卷凌長
空不向人間寄

焚餘

寂寂衡門草太元相知博得一椀譚只緣老去還投閣翻
羨伊人名不傳

董含字闔石華亭人順治乙未進士有藝葵詩集

登穹窿謁句曲行宮

山勢岿峩欲到難玉真宮殿擁千官香飄下界青冥近磬
入諸天碧落寒洞口斷雲朝放鶴石根晴樹暮棲鸞金門
羽客龍泥印夜禮星辰上醮壇

王揆字端士號芝廬太倉人順治乙未進士有芝廬集

詩話端士爲煙客長子麓臺之父梅村題其北
歸草云南內舊人逢庾信北朝文士識崔陵

壬辰北歸居楓橋別業

歸來投別業雞犬一庭前雪重千門樹湖吞萬井煙鴟夷

寒食廟蝦菜夕陽船何似營平路黃沙獵火天

讀山翁大師新蒲綠依韻柬寄

江頭老父話興亡蒲柳春光又十霜徒有子規愁望帝更
無鸚鵡憶明皇唐陵麥飯悲寒食漢臘桑門祝上方指示
傍人盡流涕講堂鐘鼓暮雲黃

王撰字異公太倉人有三餘集

詩話異公畫承家學論者謂其峯巒樹石無不肖似煙客可稱具體詩清婉

夜宿山樓

重重煙靄望中收漁網參差古渡頭木葉凋時孤雁遠月
華高處一橋浮謝公屐冷山無恙白傅船空水自流話盡
淒涼十年淚秋風殘醉卧南樓

哭外舅鹿城顧大宗伯

丙戌死難溫州江心寺

閩嶺衣冠擁殿墀，偏安猶見漢威儀。
驅車海嶠看傳檄，拜表江關始出師。
萬里弓刀空報主，一船棺槨僅從兒。
靈旗夜雨歸何處，指點文山異代祠。

贈杜于皇

憶自分攜歷變更，訪君曾過石頭城。
人驚夔府貧來句，世重樊川亂後名。
此地溪山千里夢，今宵尊酒廿年情。
西陵放櫂乘秋漲，好待荒郊泛月明。

盧廷簡字子閑江都人順治乙未武進士

白鹿泉

白鹿銜花山徑幽，寒泉疑到洞庭秋。
會聞說偈龍聽法，幾見談經石點頭。
瀑水聲從檐際落，冰花飛向澗中收。
仙蹤何處尋遺響，曉夜涓涓不斷流。

晚晴簃詩匯卷二十七終